

**KANTONALNA
PRIVREDNA
KOMORA TUZLA**

**BROJ 1 i 3/21,
januar/mart
2021. godine**



KOMORSKI INFORMATOR



**„IZGRADNJA STANDARDA
KVALITETA U OBRAZOVANJU
ODRASLIH“**



**PREMIJER HODŽIĆ
RAZGOVARAO SA
DIREKTOROM KPCT
KIKANOVIĆEM**



**NAČELNIK GUTIĆ PRIMIO
PREDSJEDNIKA KOMORE
TUZLA**




**MINISTAR PRIVREDE
ODRŽAO SASTANAK
SA PREDSTAVNICIMA
KANTONALNE PRIVREDNE
KOMORE TUZLA**

Komorski informator

Uvod

Poštovani čitaoci!



Izgleda da će i u 2021. godini pandemija diktirati dinamiku provođenja aktivnosti a time i sadržaj te dinamiku izdavanja novine Komorskiinformator. Ponovo zbog smanjenih aktivnosti, manje posjeta firmama, ograničenja u skupovima, sastancima, bilježimo aktivnosti koje su dovoljne za sadržajnu novinu koja pokriva prva tri mjeseca ove godine. Ono što se treba izdvojiti jeste uključenje Kantonalne privredne komore Tuzla u projekat Helvetas. Riječ je o projektu kojiima podršku Fondacije Helvetas – Moja budućnost, a u realizaciji zajednički učestvuju Kantonalna privredna komora Tuzla, Privredna komora Kantona Sarajevo i Privredna komora Zeničko dobojskog kantona. Kako je ranije i dogovoreno, sredinom januara je u Tuzli upriličen prvi radni sastanak u okviru realizacije jednogodišnjeg projekta „Izgradnja standarda kvaliteta u obrazovanju odraslih“.

Ono što je također od velikog značaja, jesu kontakti koje Komora ostvaruje sa predstavnicima nove Vlade Tuzlanskog kantona i općinskim načelnicima. Tako izdvajamo tri prijema:

- Premijer Hodžić razgovarao sa direktorom KPKT Kikanovićem
- Načelnik Gutić primio predsjednika Komore Tuzla
- Ministar privrede održao sastanak sa predstavnicima Kantonalne privredne komore Tuzla

Kada je u pitanju međukomorska saradnja, bilježimo posjetu delegacije Kantonalne privredne komore Tuzla, Područnoj privrednoj komori Trebinje. slični problemi u poslovanju i borbi za opstanak komore, zajednički zaključak: za kvalitetnu ulogu komore, za zdrav i jak Komorski sistem, neophodan je kvalitetan Zakon o komorama u Bosni i Hercegovini

Iz aktivnosti komorskih udruženja bilježimo redovnu sjednicu Odbora Udruženja za trgovinu, ugostiteljstvo i turizam i analizu stanja u oblastima koje pokriva Udruženja za Industriju tekstila, kože i obuće.

Prenosimo intervju predsjednika Komore, predsjednice Uprave NLB Banke d.d. Sarajevo, voditelja turističkog ureda Turističke zajednice TK.

Posebno mjestozauzima reakcija iz Komore, podrška ugostiteljskim radnicima na području Tuzlanskog kantona i poziv na preispitivanje Odluke Kriznog štaba Ministarstva zdravstva Tuzlanskog kantona koja je direktno ugrožavala rad i opstanak ugostiteljske djelatnosti.

Pored svega navedenog, Komorski informator za period januar-mart 2021. godine, donosi još niz zanimljivih informacija zbog kojih ga vrijedi pročitati...

Dino Kalesić
gl. i odg. urednik



Komorski informator Sadržaj

KANTONALNA PRIVREDNA KOMORA TUZLA

KOMORSKI INFORMATOR
BROJ 1-3/21,
januar/mart
2021. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Izet Džananović, član
4. Suad Selimović, član
5. Edina Kurtić, član

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Edina Kurtić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Hariz Altumbabić, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	Usavršavanje za NO i UO, prijave za novu grupu	4
	„Izgradnja standarda kvaliteta u obrazovanju odraslih“	5
	Premijer Hodžić razgovarao sa direktorom KPKT Kikanovićem	6
	Načelnik Gutić primio predsjednika Komore Tuzla	6
	Ministar privrede održao sastanak sa predstavnicima Kantonalne privredne komore Tuzla	6
	Delegacija komore Tuzla u posjeti komori Trebinje	7
	Zajednički stvarati povoljniji privredni ambijent	7
	Industrija tekstila, kože i obuće među najteže pogođenim u pandemiji	8
	Odluke Kriznog štaba Ministarstva zdravstva Tuzlanskog kantona...	10 i 11
	Ekonomija Tuzlanskog kantona u godini korone	14 i 15
	Predsjednica Uprave NLB Banke d.d. Sarajevo, za klix. ba...	16 i 17
	“Pandemija pogodovala razvoju turizma u TK”	19
	Najava sajamskih aktivnosti i manifestacija	25 i 26



Javni poziv za usavršavanje...

Usavršavanje za NO i UO, prijave za novu grupu

Javni poziv za dostavljanje prijava

Kantonalna privredna komora Tuzla prikuplja prijave za novu grupu za Usavršavanje predsjednika i članova nadzornih odbora i uprava privrednih društava sa učešćem državnog kapitala (prema Uredbi Vlade FBiH, "Službene novine F BiH", br. 71/09, 33/10, 23/11, 83/11, 2/13, 80/13, 48/15, 60/16 i 88/17). Početak edukacije je planiran za po formiranja grupe, a u zavisnosti od epidemiološke situacije, organizovat će se u prostorijama Komore u Tuzli ili online putem Zoom platforme, o čemu će odluka biti donesena neposredno pred početak.

Zainteresovani kandidati prijavu mogu izvršiti dostavom prijavnog upitnika (na web stranici Komore: www.kpktz.ba).

Potrebna dokumentacija:

1. prijavni upitnik
2. kopija diplome
3. uvjerenje o radnom iskustvu u struci



Cijena usavršavanja (edukacija, literatura, ispit i sertifikacija) je 880,00 KM po polazniku, a informacije o rokovima i načinu uplate bit će Vam dostavljene nakon određivanja datuma početka. Prijave i sve dodatne informacije na mail: edina@kpktz.ba ili putem faxa na broj 035/369-552 ili poštom na adresu Trg slobode bb, 75000 Tuzla.

Kantonalna privredna komora Tuzla Trg slobode bb, 75 000 Tuzla

Rok za podnošenje prijava kao i tačan termin početka usavršavanja, biće naknadno utvrđeni, po formiranju nove grupe polaznika.

Upitnik na: <http://kpktz.ba/images/stories/2019/Novembar/Prijava.pdf>

Obavještenje kandidatima...

Pripremni seminar za pravosudni ispit

Seminar će trajati devet vikenda - Program u okviru Zakona o pravosudnom ispitu

Kantonalna privredna komora Tuzla obavještava sve zainteresovane kandidate da organizuje

PRIPREMNI SEMINAR ZA POLAGANJE PRAVOSUDNOG ISPITA.

Program seminara provodit će se na osnovu i u okviru Zakona o pravosudnom ispitu (Sl. novine FBiH broj 2/95, 35/98, 29/03 i 43/13) i Programa pravosudnog ispita (Sl. novine FBiH broj 28/16).

Predavači na seminaru su članovi/ispitivači Komisije za polaganje pravosudnog ispita na nivou Federacije Bosne i Hercegovine. Seminar će trajati devet vikenda i obavljat će se u velikoj sali Kantonalne privredne komore Tuzla. U toku seminara obradit će se ispitna materija iz krivičnog prava, građanskog prava sa porodičnim pravom, privrednog prava, upravnog i radnog prava i ustavnog sistema i organizacije pravosuđa.

Realizirat će se i praktične vježbe (pismeni radovi) za polaganje pismenog djela ispita iz krivičnog i građanskog, odnosno porodičnog prava. Nakon završetka programa polaznicima će se izdati certifikat o pohađanju pripremnog edukacijskog programa za polaganje pravosudnog ispita.

Molimo, ukoliko ste zainteresovani za učešće na navedenom seminaru da popunjenju prijavu, koja se nalazi na našoj web stranici, pošaljete na fax broj 035 369 552 ili e-mail edina@kpktz.ba. Kontakt osoba Edina Kurtić, telefon broj 035 369 551.



PRIJAVA na: <http://kpktz.ba/index.php/najave/679-pripremi-seminar-za-pravosudni-ispit-od-21-oktobra>



Prvi radni sastanak na zajedničkom projektu...

„Izgradnja standarda kvaliteta u obrazovanju odraslih“

„Izgradnja standarda kvaliteta u obrazovanju odraslih“ - Fondacije Helvetas – Moja budućnost, Komore Tuzle, Sarajeva i Zenice - Ministarstva za obrazovanje i nauku, Pedagoški zavod, JU Služba za zapošljavanje Tuzlanskog kantona



Kako je ranije i dogovoreno, sredinom januara je upriličen prvi radni sastanak u okviru realizacije jednogodišnjeg projekta „Izgradnja standarda kvaliteta u obrazovanju odraslih“.

Riječ je o projektu koji ima podršku Fondacije Helvetas – Moja budućnost, a u realizaciji zajednički učestvuju Kantonalna privredna komora Tuzla, Privredna komora Kantona Sarajevo i Privredna komora Zeničko dobojskog kantona. Domaćin sastanka kojem su, uz predstavnika Komore Tuzla i Fondacije Helvetas, prisustvovali predstavnici Ministarstva za obrazovanje i nauku u Vladi Tuzlanskog kantona, Pedagoškog zavoda Tuzlanskog kantona i JU Služba za zapošljavanje Tuzlanskog kantona, bila je Kantonalna privredna komora Tuzla.

“Bila je ovo prilika da još jednom istaknemo kako je cilj projekta identificiranje potreba privrede i obrazovanje odraslih za deficitarna zanimanja u našoj privredi. Mi kroz ovaj projekat vidimo priliku i način da i dalje, još snažnije i kvalitetnije, našim članicama, firmama koje članstvom u Komori čine Komorski sistem Tuzlanskog kantona, budemo na usluzi, budemo kvalitetan i koristan servis. Vrlo je značajno istaći da su sve institucije koje smo animirali i pozvali na saradnju, prepoznale značaj projekta i istakli ulogu Komore kao nosioca jednog značajnog procesa”, izjavio je Nedret Kikanović predsjednik Kantonalna privredna komora Tuzla.

Na prvom radnom sastanku u Tuzli je dogovoreno da će sve institucije, svaka iz svog domena djelovanja, pružiti podršku i stručnu pomoć prilikom identificiranja potreba na tržištu, pripremi i provođenju obuka. Također, akteri sastanka, predstavnici uključenih institucija, iskazali su spremnost da daju svoj doprinos kod izrade programa obuke, definisanju ishoda učenja te uspostavljanja standarda kvaliteta za znanja i vještine koje će polaznici obuka steći. Još jednom je istaknut dugogodišnji problem sa kojim se susreću privredni subjekti na području Federacije Bosne i Hercegovine a to je nedostatak stručne radne snage. Privrednici posljednjih desetak godina apeluju i traže mogućnost da se kroz neformalno obrazovanje prevaziđe ovaj problem i obrazuju ljudi za potrebe domaće privrede.



Zaključeno je i dogovoreno da se u narednom periodu organizuje zajednička konferencija svih učesnika u projektu kako bi se zajednički identificirali ključni koraci djelovanja a sve s ciljem osiguranja jedinstvenog i sistemskog pristupa u realizaciji aktivnosti. Ono što je postavljeno kao krajnji cilj, što bi trebalo da bude krajnji rezultat svih aktivnosti jednogodišnjeg projekta „Izgradnja standarda kvaliteta u obrazovanju odraslih“, jeste obuka minimalno 35 i zapošljavanje 25 osoba u privrednim subjektima Tuzlanskog kantona.

D.K.



Sastanak sa novim premijerom...

Premijer Hodžić razgovarao sa direktorom KPKT Kikanovićem



Zajednički doprinjeti boljoj općoj slici privrede na području Tuzlanskog kantona

Premijer Tuzlanskog kantona Kadrija Hodžić sa savjetnikom Miralemom Nuhanovićem primio je direktora Kantonalne privredne komore Tuzla Nedreta Kikanovića. Uz čestitke za nastupajući mandat direktor Kikanović iskoristio je priliku da predstavi trenutne aktivnosti asocijacije privrednih subjekata te razgovara o nastavku dobre saradnje sa Vladom Tuzlanskog kantona. Govoreći o takozvanoj „lakoći poslovanja“ odnosno poslovnom okruženju u kojem egzistira privreda na području Tuzlanskog kantona premijera Hodžića je interesovalo šta to konkretno znači u našim uslovima. Uz napomenu da je neophodna studija o stanju na području TK, na sastanku je dogovoren zajednički angažman Vlade TK, resornog ministarstva i Kantonalne privredne komore kontinuiranim posjetama općinama i gradovima TK. Smisao zajedničkog angažmana, složili su se učesnici sastanka, je pronalaženje načina ukidanja određenih taksi a da se ne ugrozi budžet. Praćenjem trenutnog stanja i predlaganjem mjera za unaprjeđenje kantonalne privredne strukture, rečeno je ovom prilikom, cilj je doprinjeti boljoj općoj slici privrede na području Tuzlanskog kantona.

Odjeljenje za informisanje
Vlade Tuzlanskog kantona

Načelnik Gutić primio predsjednika Komore Tuzla

Unaprijediti saradnju Općine Banovići i Kantonalne privredne komore Tuzla

Bego Gutić načelnik Općine Banovići primio je u svom kabinetu Nedreta Kikanovića predsjednika Kantonalne privredne komore Tuzla. Cilj posjete bio je unaprijediti saradnju Općine Banovići i Kantonalne privredne komore Tuzla. Gospodin Kikanović upoznao je načelnika Gutića o trenutnim aktivnostima i predstavio aktuelne programe koje vodi Komora, te iskazao zainteresiranost za unapređenje saradnje sa lokalnom zajednicom i privrednicima iz Banovića. Takođe je pozvao privrednike da se aktivnije uključe u rad Privredne komore i doprinesu efikasnijem rješavanju zajedničkih problema. Istaknuto je da je Općina Banovići pokazala spremnost i odgovornost za vrijeme vanrednog stanja izazvanog koronavirusom, osigurala značajna podsticajna sredstva i na taj način sačuvala radna mjesta u ovom sektoru. U novoj budžetskoj godini bit će planirana veća sredstva za podsticaje i razne programe u oblasti privrede, poljoprivrede, obrta i srodnih djelatnosti, naglasio je načelnik Gutić, te pohvalio rad Kantonalne privredne komore. Zadatak svih je da svako u svojoj oblasti radi na poboljšanju uslova života građana, a općinska uprava će posebno povesti računa o poboljšanju usluga građanima, kako bi usluge lokalne uprave približila najsavremenijim standardima u oblasti pristupačnosti usluga, kazao je načelnik Gutić.

banovici.gov.ba

Ministar privrede održao sastanak sa predstavnicima Kantonalne privredne komore Tuzla

U prostorijama Ministarstva privrede Tuzlanskog kantona održan je sastanak sa predstavnicima Kantonalne privredne komore Tuzla, na kojem je razgovarano o dosadašnjoj saradnji i budućim zajedničkim aktivnostima. Sastanku je, pored ministra privrede Mevludina Hodžića, prisustvovao predsjednik Kantonalne privredne komore Tuzla Nedret Kikanović, sa saradnicama. Predsjednik Kantonalne privredne komore Tuzla predstavio je dosadašnji rad Komore na unapređenju poslovnog ambijenta i promocije privrede TK, komorski sistem koji čine 13 sektorskih udruženja kao i upravljačku strukturu Komore. Ujedno su predstavljene planirane aktivnosti Komore s ciljem rasterećenja privrednika na području Tuzlanskog kantona u narednom periodu. Pored toga, Kantonalna privredna komora Tuzla u saradnji sa Švicarskom Fondacijom Helvetas – Moja budućnost učestvuje u realizaciji jednogodišnjeg projekta „Izgradnja standarda kvaliteta u obrazovanju odraslih“ s ciljem identifikiranja potreba privrede i obrazovanja odraslih za deficitarna zanimanja. Vezano za promotivne aktivnosti Komore, predsjednik Komore je najavio izradu publikacije o pokretanju poslovanja za start up kompanije. Ministar privrede je ovom prilikom istakao ključne aktivnosti Ministarstva u proteklom periodu navodeći pri tome finansijsku podršku pruženu malim i srednjim preduzećima i obrtima u okviru realizacije programa „Podrška razvoju Kantona“ za 2020. godinu kao i aktivnosti sprovedene u skladu sa Zakonom o subvenciji za ublažavanje posljedica uzrokovanih stanjem nesreće na području Tuzlanskog kantona. U narednom periodu, Ministarstvo pored već započetih aktivnosti na realizaciji kreditne linije i subvencioniranja dijela kamatne stope, planira i programe finansijske podrške privrednim subjektima. U narednom periodu Ministarstvo privrede i Kantonalna privredna komora Tuzla nastavit će sa zajedničkom saradnjom na uređenju privrednog sistema, poslovanja i razvoja privrednih subjekata u Tuzlanskom kantonu.

Odjeljenje za informisanje
Vlade Tuzlanskog kantona



Međukomorska saradnja...

Delegacija komore Tuzla u posjeti komori Trebinje

Za kvalitetnu ulogu komore, za zdrav i jak Komorski sistem, neophodan je kvalitetan Zakon o komorama u Bosni i Hercegovini



Delegacija Kantonalne privredne komore Tuzla posjetila je Područnu privrednu komoru Trebinje. Razgovaralo se o aktuelnom momentu Komorskog sistema i njegovom značaju za privredu Bosne i Hercegovine. Veselin Savić direktor Područne privredne komore Trebinje predstavio je privredna kretanja u Trebinju i području koje pokriva Komora. Analizirane su aktivnosti u industrijskim granama i djelatnostima firmi članica Komore Trebinje, problemi sa kojima se susreću, koraci koje je potrebno poduzeti kako bi se stvorio povoljniji poslovni ambijent. Dobrila Ratković saradnica direktora Savića i rukovodilac sektora računovodstva i finansija govorila je o tema koje su aktuelne u svim komorama na području Bosne i Hercegovina pa tako i u Trebinju a to su finansiranje, naplata članarine, borba za opstanak komorskog sistema. Razgovaralo se i o mogućnosti saradnje na zajedničkim projektima,

jačanju međukomorske saradnje, sajamskim aktivnostima, problemima sa kojima se susreću privrednici nakon proglašenja Pandemije, mjerama koje su neophodne za prevazilaženje problema. Delegaciju Kantonalne privredne komore Tuzla činili su Edina Kurtić rukovodilac Sektora udruženja, Almir Mešić rukovodilac Sektora za finansije i opće poslove i Dino Kalesić rukovodilac Sektora za edukaciju, promociju, regionalnu saradnju i odnose s javnostima. **“Komorski sistem je u svim privredno razvijenim i organizovanim državama veoma značajna karika razvoja privrede. Komore su mjesto gdje privrednici mogu i trebaju da kreiraju svoje poslovno okruženje, razmjenjuju informacije i iskustva. Komora je institucija koja ima značajnu ulogu u povezivanju privrednika u široj regiji i trebala bi da ima značajno mjesto za privrede Republike Srpske, Brčko Distrikta i Federacije BiH. Za kvalitetnu ulogu komore, značajan doprinos razvoju i promocije privrede Bosne i Hercegovine, za zdrav i jak Komorski sistem, neophodan je kvalitetan Zakon o komorama u Bosni i Hercegovini”**, zajednički je zaključak učesnika sastanka. Veselinu Saviću direktoru Područne privredne komore Trebinje i saradnici Dobrili Ratković, upućen je poziv za što skoriju posjetu Tuzli i Tuzlanskom kantonu, nastavak razgovora i jačanje saradnje za Kantonalnom privrednom komorom Tuzla.

Iz Udruženja za trgovinu, ugostiteljstvo i turizam...

Zajednički stvarati povoljniji privredni ambijent



Članovi Odbora za trgovinu, ugostiteljstvo i turizam Kantonalne privredne komore Tuzla održali su redovnu sjednicu, u proširenom sastavu. Sjednici su prisustvovali Hamza Bešić ministar za trgovinu, turizam i saobraćaj u Vladi Tuzlanskog kantona i Dželmira Huremović pomoćnica ministra. Kada je u pitanju novi saziv Vlade Tuzlanskog kantona, vrijedno je pomenuti da je ministar Bešić prvi ministar koji je prisustvovao radu jednog komorskog Udruženja što upućuje na nastavak dobre saradnje resornog kantonalnog Ministarstva i komorskog Udruženja i spremnost da se uključe u rješavanje problema koji su prisutni u oblastima trgovine, turizma i ugostiteljstva. A problema ima puno, dug je spisak onih koje treba što prije početi rješavati. Kasim Selimović predsjednik Odbora Udruženja je upoznao ministra sa svim poteškoćama sa kojima se

susreću privredni subjekti na području Tuzlanskog kantona. Apostrofirana je djelatnost trgovine kao faktor socijalne stabilnosti nap odručju Tuzlanskog kantona. Razmatrane su određene zakonske procedure, mogućnost smanjenja određenih parafiskalnih nameta koji su dodatni uteg opstanku privrednih subjekata. Razgovaralo se i o uticaju pandemije koronavirusa na poslovanje subjekata koji su okupljeni u ovom komorskom Udruženju. Istaknuta je neophodnost zajedničkog djelovanja na pokušaju saniranja posljedica, stvaranja povoljnijeg ambijenta za razvoj privrede, očuvanje radnih mjesta. Dželmira Huremović pomoćnica ministra je upoznala ministra Bešića o dosadašnjim zajedničkim aktivnostima, podršci koju Ministarstvo već godinama pruža u radu ovog komorskog Udruženja. Dogovoreno je da se, u skladu sa uslovima poslovanja koje nameće novonastala situacija, zajedničkim sastancima, dogovorima, razmjenama mišljenja i iskustava, iznađu modaliteti buduće saradnje kako bi se i udruženje i Ministarstvo stavili u službu pomoći privredni, bili istinski servis privrednim subjektima okupljenim u ovo komorsko Udruženje.

Pripremio: Dino Kalesić



Iz Udruženja za Industriju tekstila, kože i obuće...

Industrija tekstila, kože i obuće među najteže pogođenim u pandemiji

Privredna grana je među najpogođenijim u pandemiji



Industrija tekstila, kože i obuće ima veliki značaj u privredi Tuzlanskog kantona, uzimajući u obzir da se radi o radnointenzivnoj djelatnosti koja uglavnom zapošljava žene i koja je na kraju 2019. zapošljavala 2300 radnika u industriji tekstila i 2800 u industriji kože i obuće. Nažalost, ova privredna grana je među najpogođenijim u posljednjih godinu dana koliko traje pandemija koronavirusa širom svijeta. Prve posljedice ova industrija je osjetila još na samom početku 2020. godine kada su počela prva kašnjenja isporuka repromaterijala koji je dolazio iz Kine, što je dovelo do kašnjenja isporuka prema kupcima. Sa prvim lockdown-om u Italiji a zatim i ostatku Evrope, došlo je i do ozbiljnih problema zbog nemogućnosti plasmana proizvoda krajnjim kupcima te smanjene potražnje za tekstilnim proizvodima. Proizvođači u Tuzlanskom kantonu su se susreli sa smanjenjem i otkazivanjem narudžbi što je značajno ugrozilo njihovo poslovanje. U kratkom roku, dio firmi se preorijentisao na proizvodnju zaštitne opreme, skafandera i maski, ali s ponovnom normalizacijom ponude na tržištu ovih medicinskih proizvoda i tekstilna industrija je morala svoju proizvodnju vratiti u svoje primarne tokove. Prema podacima Federalnog zavoda za statistiku, u 2020. godini došlo je do pada industrijske proizvodnje u ovoj industriji i to:

- proizvodnja tekstila 13,4%,
- proizvodnja odjeće 18,6%
- proizvodnja kože i srodnih proizvoda 27,2%.



Pošto se radi o izvozno orijentisanoj privrednoj grani, pad obima proizvodnje odrazio se i na pad izvoza u industriji tekstila, kože i obuće, i to:

- 20% pad izvoza odjeće,
- 22% pad izvoza obuće,
- 31,7% tašni, torbi i sličnih proizvoda,
- te 36,8% pad izvoza kože, krzna i proizvoda od ovih sirovina.

Pokazatelji iz januara 2021. godine a u odnosu na isti mjesec prošle godine, ukazuju na povećanje izvoza iz Bosne i Hercegovine i to 2,9 odsto a smanjenje uvoza u Bosnu i Hercegovinu za 5,7 odsto.



Imajući u vidu ove podatke za očekivati je pozitivne pomake u narednom periodu i kada je u pitanju Industrija tekstila, kože i obuće. Popuštanje mjera, prije svega u zemljama sa kojima posluju bosanskohercegovačke firme iz navedenih grana industrije (Italija, Njemačka, Turska, Kina, Slovenija, Hrvatska, Srbija), trebale bi značajnije uticati na oživljavanje proizvodnje, pozitivnija privredna kretanja, bolji protok roba, te u konačnici sigurnije poslovanje, nove poslovne iskoraka i povećanje zaposlenosti.

Pripremila: Edina Kurtić sekretar
Udruženja za Industriju tekstila, kože i obuće



AVP Sava izdvojila 2 miliona i 150 hiljada KM...

Višemilionska ulaganja u uređenje i regulaciju rijeka u Tuzlanskom kantonu

Ministar poljoprivrede, vodoprivrede i šumarstva Tuzlanskog kantona Vahidin Smajlović izrazio je zadovoljstvo planiranim ulaganjima u vodotoke na području Tuzlanskog kantona



Agencija za vodno područje rijeke Save Sarajevo je u Planu i Finansijskom planu za 2021. godinu predviđela regulaciju i uređenje dva vodotoka u Tuzlanskom kantonu, Spreču i Tinju. Za te namjene AVP Sava je izdvojila 2 miliona i 150 hiljada KM. Cilj je zaštititi naselja, putnu infrastrukturu i materijalna dobra od štetnog djelovanja voda. O planiranim radovima razgovarano je tokom posjete delegacije AVP Sava ovom kantonu i susreta s ministrom poljoprivrede, vodoprivrede i šumarstva TK, te načelnicima općina Lukavac i Doboj Istok. Kada je riječ o Spreči, predviđeno je uređenje i čišćenje vodotoka u MZ Mala Brijesnica u općini Doboj Istok, vrijednost ovog projekta je 200 hiljada KM. Drugi projekt je čišćenje korita Spreče na deset lokacija u šest mjesnih zajednica u Gračanici. Za ove namjene izdvojeno je 250 hiljada KM.

“Planirano je i uređenje korita i povećanje proticajnog profila Spreče u Lukavcu, nizvodno od mosta u Puračiću, vrijednost tog projekta je milion i 300 hiljada KM. Nakon što bude riješen preostali dio imovinsko-pravnih odnosa, obavićemo tendersku proceduru i vjerujem da će do kraja godine taj posao biti urađen. Za uređenje i zaštitu od erozija obala Tinje u MZ Kiseljak u Srebreniku izdvojeno je 150 hiljada KM. Kada je riječ o Tinji, planirano je uređenje i čišćenje korita u MZ Špionica, za te radove smo predvidjeli 250 hiljada KM”, kazao je direktor AVP Sava Sejad Delić.

Direktor Delić je podsjetio da su u okviru projekta koji implementira UNDP sredstvima međunarodnih finansijskih institucija predviđeni i radovi na Spreči. Riječ je o grant sredstvima u vrijednosti od 6 miliona dolara. Pet je projekata iz Federacije BiH i tri iz RS. **“Prvi pilot projekat uređenja korita Spreče, vrijedan blizu 2,5 miliona KM, predviđen je od mosta Karanovac do ušća Sokoluše i Prenje u Gračanici. Drugi se odnosi na uređenje korita Spreče od ušća Jale do mosta kod Koksare u Lukavcu i vrijedan je 3 miliona KM. Slijedi posao općinske i gradske administracije u Lukavcu i Gračanici na rješavanju imovinsko-pravnih odnosa, izdavanju urbanističke i građevinske dozvole”,** kazao je Delić.



Ministar poljoprivrede, vodoprivrede i šumarstva Tuzlanskog kantona Vahidin Smajlović izrazio je zadovoljstvo planiranim ulaganjima u vodotoke na području Tuzlanskog kantona. Pozvao je resorne službe u općinama na saradnju kako izdavanje neophodne dokumentacije ne bi bilo prepreka planiranim radovima. Tokom sastanka je bilo riječi i mogućnosti otvaranja ureda Agencije na području Tuzlanskog kantona. “S obzirom da je ta oblast regulirana Zakonom o vodama FBiH, inicijativu ćemo uputiti resornom ministarstvu”, kaže ministar Smajlović. Na sastancima je bilo riječi i o dugovanjima za posebne vodne naknade te mogućnostima zajedničkog djelovanja u cilju naplate potraživanja koja postoje.

Biznis.ba



Odluke Kriznog štaba Ministarstva zdravstva Tuzlanskog kantona...

Skraćeno pa produženo vrijeme rada ugostiteljskih objekata

Rad ugostiteljskih objekata do 20 sati - Mirni protesti tuzlanskih ugostitelja ispred Vlade TK - Sastanak predstavnika Vlade TK i ugostitelja - Reakcija iz Kantonalne privredne komore Tuzle - Ugostiteljima omogućen rad do 23 sata, ali uz određene mjere prevencije



Zbog stalnog rasta broja zaraženih na području Kantona, pogoršane epidemiološke situaciju na području BiH, kao i u državama regiona, naročito povećanog broj oboljelih u susjednim kantonima, povećanog procenta teško oboljelih u odnosu na ukupan broj zaraženih, povećanog obolijevanje osoba mlađe životne dobi, kao i pojave i širenja novih sojeva SARS-CoV-2 virusa, Krizni štab Ministarstva zdravstva Tuzlanskog kantona je, s ciljem sprečavanja daljeg povećanja broja zaraženih i oboljelih na području kantona, donio odluku da se uvedu restriktivne mjere. S tim u vezi, od 3. marta je rad svih ugostiteljskih objekata na području Tuzlanskog kantona bio ograničen na najduže do 20.00 sati a prema Naredbi koju je 2. marta donio Krizni štab Ministarstva zdravstva Tuzlanskog kantona. Ova naredba odnosi se na sve ugostiteljske objekte, bez obzira da li se radi o zasebnom objektu ili objektu u sklopu nekog drugog javnog objekta, a prema odluci, trebalo je da važi do 18. marta 2021. godine. Svim gradskim/općinskim kriznim štabovima, kao i gradskim i općinskim inspekcijama je naređeno da izvrše kadrovsko jačanje inspeksijskih službi, te da maksimalno pojačaju inspeksijski nadzor kada je u pitanju realizacija naprijed navedene Naredbe, kao i primjena važećih preporuka i naredbi kada je u pitanju način organizacije i rada ugostiteljskih objekata. Od nadležnih kantonalnih i gradskih/općinskih inspekcija, kao i od Uprave policije TK je zatraženo da pojačaju nadzor nad provođenjem važećih naredbi i preporuka. Ovakva mjera nije naišla na odobravanje ugostiteljskih radnika na području Tuzlanskog kantona.

Mirni protesti tuzlanskih ugostitelja ispred Vlade TK

Tuzlanski ugostitelji okupili su se u neformalnu grupu poduzeli sve potrebne radnje prema Upravi policije MUP-a TK i u skladu sa epidemiološkim mjerama održali mirne proteste ispred zgrade Vlade Tuzlanskog kantona. Kriznom štabu Ministarstva zdravstva Tuzlanskog kantona predstavnici ugostitelja sa područja Grada Tuzla su dostavili svoje zahtjeve:

- Vraćanje radnog vremena regulisanog zakonom do 23 sata;

- Ukoliko ne dođe vraćanja radnog vremena do 23 sata, tražimo odgovornost nadležnih donosioca osporavanih naredbi i odluka da preuzmu odgovornost za nadoknadu štete nanesenom naredbom o skraćenom radnom vremenu;
- Sastanak sa premijerom Vlade TK, ministrom zdravstva TK i predstavnicima Kriznog štaba TK;
- Tražimo prisustvo predstavnika ugostitelja pri kreiranju i donošenja odluka i naredbi koje su vezane za ugostiteljski sektor.

Pozvali su i sve građane/ke TK da im se pridruže i pruže podršku za ostvarivanje prava ali i opstanak cjelokupnog ugostiteljskog sektora koji broji oko 20.000 uposlenih kroz javnu podršku i jasan stav da ovakve odluke ne mogu biti jednostrano donesene, bez konsultacije sa predstavnicima sektora niti potencijalnih rješenja za štetu nanесenu tim odlukama. Istakli su kako je vrijeme da vlast i odgovorni preuzmu potpunu a ne parcijalnu odgovornost za sve one koji svoj posao rade pošteno i godinama pune budžet kojim oni upravljaju. Ugostitelji su nakon protesta održali sastanak sa predstavnicima Vlade TK.

Konstruktivan sastanak Vlade TK i predstavnika ugostitelja



Mjera ograničenja rada ugostiteljskih objekata do 20 sati ostaje na snazi do 9. marta, kada će Krizni štab Ministarstva zdravstva TK, na osnovu novih podataka o epidemiološkoj situaciji, donijeti nove mjere koje neće biti diskriminirajuće niti



za jedan sektor. Odnosno razmatrati će se moguće ukidanje ove mjere ili eventualno njeno proširivanje i na druge djelatnosti, dogovoreno je, između ostalog na sastanku delegacija Vlade Tuzlanskog kantona i Kriznog štaba sa predstavnicima neformalne grupe ugostitelja sa područja Tuzlanskog kantona.

S druge strane delegacija Vlade Tuzlanskog kantona, predvođena premijerom Kadrijom Hodžićem, je izrazila razumijevanje za iskazano nezadovoljstvo ugostiteljskih radnika, ali i podcrtala da zdravlje ljudi ipak mora biti na prvom mjestu. U tom smislu je rečeno da Vlada trenutno priprema svoj program rada, koji između ostalog sadrži i poticajne mjere za privredne subjekte i obrte. S tim u vezi premijer Hodžić je istaknuo da će, posebna pažnja biti posvećena transparentnom pristupu u dodjeli ovih poticaja. „Kao i u svim drugim aktivnostima, posebnu pažnju ćemo posvetiti izradi kriterija za raspodjelu sredstava i svoju priliku za učestvovanje u izradi kriterija svakako će imati i predstavnici ugostitelja, hotelijeri i turistički radnici, koji su među najviše pogođenim djelatnostima u ovo vrijeme pandemije. U tom smjeru očekujemo da oni dobiju priliku i da budu pomognuti u narednom periodu“, kazao je premijer Hodžić.

„Evidentno je da se epidemiološka situacija u cijeloj Federaciji BiH, pa i u našem kantonu pogoršava. Svakog dana imamo povećanje broja registriranih zaraženih pacijenata. Uz to je i klinička slika zaraženih pacijenata nešto teža. Teško je pretpostaviti u kojem će se ovo smjeru kretati i strah nas je da dođemo u situaciju od 2.000 do 3.000 novozaraženih osoba dnevno. Ova mjera je pokušaj da preveniramo takvu situaciju koja bi mogla rezultirati i mnogo restriktivnijim mjerama“, kazao je predsjednik Kriznog štaba, ministar zdravstva TK Božo Jurić.

„Mi smo imali vrlo konstruktivan razgovor gdje smo razmijenili sve ono što nas boli. Od ljudi iz oblasti zdravstva smo čuli šta nas to očekuje u narednom periodu, a čuli smo i glas ugostitelja koji su s pravom iskazali svoj dio nezadovoljstva. Smatram da je ugostiteljski sektor u nekim dosadašnjim davanjima bio zapostavljen i dogovorili smo se da ćemo

prilikom kreiranja kriterija za dodjelu sredstava konsultovati i ovaj sektor, kako bi smo donosili najpravednije mjere“, kazao je ministar finansija Vedran Lakić.



Kantonalna privredna komora Tuzla

Poziv na preispitivanje Odluke

- Saopštenje za javnost Kantonalne privredne komore Tuzla u povodu Odluke kojom je zabranjen rad ugostiteljskim objektima poslije 20,00 sati -

Kantonalna privredna komora Tuzla u ime firmi članica okupljenih u Udruženju za trgovinu, turizam i ugostiteljstvo, poziva članove Kriznog štaba Ministarstva zdravstva Tuzlanskog kantona da još jednom preispitaju novu Odluku kojom je zabranjen rad ugostiteljskim objektima poslije 20,00 sati.

Smatramo da će pooštavanje mjera dodatno opteretiti djelatnost ugostiteljstva koja je jedna od najteže pogođenih pandemijom koronavirusa, opasno ugroziti egzistenciju 20.000 radnika, njihovih porodica, uticati na opstanak brojnih ugostiteljskih objekata i generalno dodatno usporiti oporavak poljuljane privrede na području Tuzlanskog kantona.

Pozivamo nadležne da vrate na snagu prethodnu Odluku koja propisuje vraćanje radnog vremena regulisanog zakonom do 23,00 sata.

Također, pozivamo sve ugostitelje da se strogo pridržavaju svih ranije propisanih epidemioloških mjera (distanca, dezinfekcija, propisani broj ljudi za određenu kvadraturu objekta, radno vrijeme...) a organe inspekcijских službi pozivamo da pojačaju kontrolu svih ugostiteljskih objekata na području Tuzlanskog kantona.

Samo zajedničkim naporima i djelovanjem možemo doprinijeti sprječavanju katastrofalnih posljedica pandemije i samo uvažavanjem, podržavanjem i zajedničkim djelovanjem privrednika i Vlade, možemo očuvati privredu Tuzlanskog kantona.

Ugostiteljima omogućen rad do 23 sata, ali uz određene mjere prevencije

U skladu sa trenutnom epidemiološkom situacijom, na sjednici Kriznog štaba Ministarstva zdravstva Tuzlanskog kantona održanoj 9. marta, doneseno je više naredbi koje su podijeljene u skladu sa specifičnostima za zatvorene prostore, trgovine, radnje, ugostiteljske objekte i javni prijevoz. Novim naredbama ugostiteljskim objektima je omogućen rad do 23 sata. Također, trgovinama na veliko i malo, pružaocima ostalih uslužnih djelatnosti, subjektima koji pružaju usluge iz oblasti hotelijerstva, ugostiteljstva, umjetnosti i zabave (kina, pozorišta, muzeji i sl), kladionicama i sl., je naređeno da na ulazu u objekat postavie obavještenje o ukupnom broju lica koja mogu boraviti u objektu, u odnosu na njegovu površinu, računajući da je za svaku osobu potrebno 4m², a ne više od 30 lica. Tržni centri su dužni postaviti obavijest o ukupnom broju lica, zbirno po svim subjektima u sklopu tržnog centra. Druga naredba se odnosi o higijensko epidemiološkim mjerama kod pružanja ugostiteljskih usluga kojih će se morati pridržavati ugostitelji. Posebna molba vlasnicima ugostiteljskih objekata je upućena da aktiviraju stolove na otvorenim prostorima, kao i nadležnim gradskim/općinskim službama da imaju u vidu potrebu za proširenjem bašti ugostiteljskih objekata. Treća naredba se odnosi na javni prijevoz koji je neophodan zbog funkcionisanja škola, fakulteta, radnih mjesta, cirkulacije i potreba stanovništva. Posebno je važno nošenje maske, i smanjena komunikacija za vrijeme prijevoza u javnim prijevoznim sredstvima. Sa ovim setom naredbi nastoji se zajedničkim aktivnostima spriječiti neželjene scenarije iz bližih kantona, te da odgovornim ponašanjem i radom sačuvamo zdravlje naših najbližih i izbjegnemo zatvaranje objekata.

Pripremio: Dino Kalesić



Razgovor sa privrednicima...

Premijer Hodžić primio u posjetu delegaciju Sode Sisecam

Vlada je iskazala spremnost da pomogne poslovanje ovog veoma značajnog privrednog subjekta i trećeg po veličini izvoznika u BiH



Premijer Tuzlanskog kantona Kadrija Hodžić je sa resornim ministrima primio u posjetu delegaciju Sode Sisecam iz Lukavca, predvođenu generalnim direktorom Sefom Ozincegedikom. Teme ovog prvog radnog sastanka bile su poslovni izazovi i razvojni projekti Sode Sisecam. Posebna pažnja tokom razgovora bila je posvećena planiranom povećanju proizvodnih kapaciteta Sode Sisecam u Lukavcu (SSL) tokom 2021. godine, te samim tim i kapacitetima proizvodnje slanice u Rudniku soli Tuzla, kao osnovnom preduslovu koji se u tom pogledu treba ostvariti.

Ovom prilikom premijer Hodžić je istaknuo da su se resorni ministri privrede, prostornog uređenja i zaštite okolice, te poljoprivrede, šumarstva i vodoprivrede i Vlada u cjelini već upoznali sa situacijom i međusobnim odnosom Sode, Rudnika soli i drugih privrednih društava u većinskom državnom vlasništvu koji posluju sa Sodom, kao i neophodnosti snažnijeg angažmana Rudnika u pogledu osiguranja dovoljnog broja novih istražno – eksploatacionih bušotina.

„Upoznati smo sa činjenicom da Rudnik posljednjih godina nije otvarao nove bušotine, kao preduslove za očuvanje i proširenje svojih proizvodnih kapaciteta. Shvatamo i da takav odnos unosi nemir i nesigurnost za dugoročno poslovanje Sode, te ćemo u tom smislu poseban fokus aktivnosti Ministarstva privrede, ali i Vlade u cjelini, usmjeriti ka otklanjanju te nesigurnosti“, kazao je premijer



Hodžić.

Premijer Hodžić također je izjavio da Vlada TK, uvažavajući stavove lokalne zajednice, ne podržava istraživanje i eksploataciju soli na onim nalazištima koja bi mogla ugroziti i ponovno izazvati tonjenje u gradskoj zoni grada Tuzle, te da ležišta na Tetimi, uz eventualno neke druge lokacije, mogu osigurati dugoročnu stabilnost poslovanja kako Sode, tako i drugih korisnika slanice.

Osim izazova u pogledu osiguranja dovoljne količine sirovinke slanice, susret je iskorišten i za razgovore o drugim poslovnim izazovima, a Vlada je iskazala spremnost da pomogne poslovanje ovog veoma značajnog privrednog subjekta i trećeg po veličini izvoznika u BiH.



Predstavnici Sisecam grupacije su primijetili da se Vlada Tuzlanskog kantona dobro upoznala sa potrebama i planovima Sode Sisecam, te su se zahvalili na angažmanu za rješavanje poslovnih izazova s kojima se susreću.

Odjeljenje za informisanje
Vlade Tuzlanskog kantona



Razgovori o privrednim potencijalima...

Turci žele investirati u Banoviće

Mogući zajednički projekti privrednika iz Banovića i Ankare



Općinski načelnik dr. Bego Gutić sa saradnicima je ugostio delegaciju Turske firme İndes Mühendislik koju je predvodio generalni direktor Melih OZKAN. Razgovaralo se o privrednim potencijalima, mogućnostima i saradnji u oblasti privrede, te mogućim zajedničkim projektima privrednika iz Banovića i Ankare. İndes Mühendislik se bavi dizajniranjem i montažom najsavremenijih uređaja za napajanje energijom, kao što su sistemi za praćenje koji rade na principu obnovljivih izvora energije, dizajnom i montažom opreme za praćenje šumskih požara, javne rasvjete i sličnim projektima. Firma İndes Mühendislik ima namjeru osnovati prodajni centar, odnosno prodajno predstavništvo u Bosni i Hercegovini u saradnji sa privatnom firmom sa lokalnog nivoa, odakle namjeravaju proširiti prodajni lanac za tržište zemalja Evropske unije. Na području Banovića postoji nekoliko firmi koje bi mogle naći zajednički interes sa Turskim İndes-om, kazao je načelnik Gutić tokom razgovora te predložio povezivanje i prvu radnu posjetu privatnim kompanijama koje bi mogle naći zajednički interes u proširenju svoje djelatnosti otvaranjem nove vrste proizvodnje. Predstavnici Turske firme İndes izrazili su želju da odmah posjete firmu Elektromont d.d. Banovići, što su i učinili nakon razgovora sa predstavnicima lokalne zajednice.



„Ono što mi kao lokalna zajednica radimo intenzivno jeste da poslovni ambijent koji je u Banovićima bio vrlo složen i komplikovan, probamo pojednostaviti i osigurati prostor za razvoj domaćih kompanija, a zainteresovani smo i za prihvatanje i uvođenje stranih kompanija. U tom smislu svim potencijalnim stranim investitorima spremni smo ponuditi po najpovoljnijim uslovima prostor, odnosno zemljište. Pored toga država mora osigurati i određenu vrstu podrške, pogotovo onim kompanijama koje stvaraju novu vrijednost i upošljavaju nove radnike i s tim u vezi mi smo ove godine u budžetu

predvidjeli značajna sredstva za pomoć privrednicima i poljoprivrednicima. Za nas je vrlo interesantan program firme İndes iz Turske, jer mi smo mala općina koja upošljava oko tri hiljade ljudi, što je više od 50 posto zaposlenih i ulazimo u jedan vremenski period kada se ugalj sve više izbacuje iz upotrebe, pogotovo kada Evropska unija postavlja sve strožija pravila u pogledu eksploatacije, proizvodnje i korištenja uglja. Zbog toga mi moramo početi razvijati neke nove industrije ili se ponovo početi baviti onim industrijama po kojima smo nekad bili prepoznatljivi, kao što je metalna industrija, tekstilna i druge. Razmišljamo o alternativni, privlačenju stranih investitora i osiguranju novih radnih mjesta izvan RMU Banovići“, kazao je načelnik Gutić.



Predsjednik Kikanović za akta.ba...

Ekonomija Tuzlanskog kantona u godini korone

Bez katastrofalnih scenarija i masovnih otpuštanja



Posljedice korona krize i usporavanje privredne aktivnosti se značajno osjete i na privrednim pokazateljima u Tuzlanskom kantonu, posebno industrijskoj proizvodnji i vanjskotrgovinskoj razmjeni, kazao je u razgovoru za portal Akta.ba Nedret Kikanović, predsjednik Kantonalne privredne komore Tuzla. Iako podaci za 2020. godinu još uvijek nisu kompletirani, u zavisnosti od djelatnosti, prema podacima za oktobar, bilježi se pad obima industrijske proizvodnje između 10 - 20% za najzastupljenije privredne djelatnosti.

“Baš kao i kod pada obima industrijske proizvodnje, imali smo i pad uvoza i izvoza u ovoj godini. Prema raspoloživim podacima imali smo pad izvoza od 9% i pad uvoza od 15%. Pokrivenost uvoza izvozom je 90%. Neke djelatnosti bilježe veći pad izvoza, poput tekstila i obuće i metaloprerađivačkog sektora (između 10 – 20%), a imamo i djelatnosti koje su ostvarile rast izvoza (hrana +7,7%, kapitalni proizvodi 10%). Svakako će kompletirani podaci za 2020. godinu dati jasniju sliku o rezultatima”, navodi naš sagovornik.

Sačuvana radna mjesta

Prema podacima Porezne uprave Federacije BiH, sa 31.12.2020. u Tuzlanskom kantonu je, prema prebivalištu osiguranika, bilo 101.319 zaposlenih osoba. Prema istom izvoru, u januaru 2020. je bilo 101.653 zaposlene osobe.

“Nema značajnih odstupanja u ukupnom broju zaposlenih, iako je u jednom momentu, na vrhuncu lockdowna u našoj privredi došlo do otpuštanja oko 6.000 ljudi. To ne znači da nije bilo pojedinačnih otpuštanja u najviše pogođenim privrednim granama, ali smo ukupno ipak uspjeli da sačuvamo radna mjesta”, ističe on.

Napominje da su se svi privrednici u protekloj godini susretali sa problemima, prije svega zbog velike neizvjesnosti do kada će ovo stanje potrajati. U zavisnosti od djelatnosti, razlikovali su se i problemi po pojedinim industrijama.

“Zadovoljni smo što smo prošli bez katastrofalnih scenarija i masovnih otpuštanja. To je rezultat strukture privrede. Kod nas je skoncentrisana industrija, izvozno orjentisana koja radi za velike evropske kupce. Svako pokretanje evropske privrede automatski vuče i naše industrije koje za njih rade poslove. To je razlog bržeg oporavka. Naravno, djelatnosti poput turizma i ugostiteljstva se neće tako brzo oporaviti”, kaže Kikanović.

Smatra da će privredni oporavak biti dug, Svjetska banka procjenjuje da će na globalnom nivou biti potrebno oko 5 godina da se privreda oporavi. S obzirom na komplikovanu situaciju u BiH i čitav niz negativnih trendova koji su bili prisutni i prije korona krize, naša zemlja će se svakako naći u velikom problemu. Svjetska banka procjenjuje da će recesija biti najveća u posljednjih 25 godina.

“Svi nivoi vlasti moraju biti spremni u narednom periodu osigurati pomoć ugroženim privrednim subjektima, ali pri tome je potrebno više voditi računa o kriterijima po kojima firme mogu aplicirati, pošto prošlim aktivnostima, zbog neadekvatnih kriterija jedan broj privrednih subjekata koji je realno imao značajne posljedice na poslovanje, nije mogao koristiti sredstva”, poručuje predsjednik tuzlanske komore.



Kantonalna
privredna
komora Tuzla



Tuzlanski kanton najveći izvoznik u Federaciji

Govoreći o vanjskotrgovinskoj razmji ovog kantona, Kikanović kaže da je Tuzlanski kanton najveća privreda i najveći izvoznik u Federaciji.

“Naša privreda je izvozno orijentisana, uglavnom okrenuta zemljama Evropske unije. Najznačajniji vanjskotrgovinski partneri su nam Austrija, Njemačka, Italija. Od zemalja regiona, najviše radimo sa Srbijom i Hrvatskom. Svakako, naše firme posluju i sa svim ostalim zemljama svijeta”, navodi on.

U zavisnosti od djelatnosti, razlikovali su se i problemi po pojedinim industrijama. U tekstilnoj industriji je bilo značajnih otkazivanja narudžbi, metalna industrija je vezana za njemačku autoindustriju, te je i ona osjetila posljedice u padu tražnje. Slično je bilo i sa ostalim izvoznim djelatnostima. Ugostiteljstvo i hotelijerstvo zbog ograničenja rada, broja ljudi i manjeg kretanja ljudi uopšte, ima značajne finansijske posljedice. Zatvorenost granica i otežano putovanje ljudi otežava i ugovaranje novih poslova, direktnih susreta sa kupcima i izlazak na nova tržišta. Ovo su problemi izazvani posljedicama korona virusa.

“Osim ovih, tu su i oni dugogodišnji problemi naše privrede, poslovni ambijent koji nije stimulirajući, veliki fiskalni i parafiskalni nameti, duge i skupe procedure, potrebe za usklađivanjem i donošenjem zakona koji će olakšati poslovanje, kao i masovan odlazak ljudi i nedostatak radne snage. Stabilno političko okruženje i stvaranje povoljnog ekonomskog, ali i društvenog ambijenta te rješavanje demografske krize (odlazak stanovnika), nužni su za očuvanje i oporavak privrede, pošto su naši problemi nastali mnogo prije krize izazvane koronom. Svi nivoi vlasti, zajedno sa nevladinim sektorom, privredom i ostalim akterima, moraju se maksimalno angažovati na definisanju strateških pravaca oporavka privrede i društva”, naglašava.



Na raspolaganju privredi

Kao i svima, tako je i Komori 2020. godina bila jako izazovna. Mjere i zatvaranja su značajno ograničila neke aktivnosti koje komora tradicionalno radi. Skoro svi sajmovi su bili otkazani i nije bilo moguće na dosadašnji način promovisati privredu TK, ograničenje okupljanja je onemogućilo organizaciju većih događaja. Ipak, trudili su se uspostaviti poslovni model koji će im omogućiti da u ovim okolnostima budu na raspolaganju privredi primjenom informacionih tehnologija.

“Misija Kantonalne privredne komore Tuzla i dalje ostaje unaprijeđenje privrede i poduzetništva u Tuzlanskom kantonu kroz: zastupanje interesa članica, obrazovanje, informisanje, promovisanje i poslovno povezivanje. Vizija jepostati vodeća institucija u Tuzlanskom kantonu na polju zastupanja interesa privrede, poslovnog obrazovanja, informisanja i pružanja savjetodavnih usluga, te promovisanja i povezivanja privrede Tuzlanskog kantona sa svjetskom privredom”, kazao je Kikanović.

Shodno tome, rade na redovnom informisanju privredinika, promovisanju putem digitalnih medija, online edukacijama, te redovnim prikupljanjem podataka sa terena prate situaciju. Također, rade i na rješavanju konkretnih i pojedinačnih problema s kojima su se privrednici obraćali.



“I u ovoj 2021. godini, naš je cilj biti servis našim članicama i raditi na razvoju privrede TK, omogućiti im da imaju pouzdane informacije i zajedno raditi na prevazilaženju kriznog perioda koji je pred nama. S obzirom na neizvjesnost koja nas očekuje u 2021. godini, aktivnosti ćemo prilagođavati aktuelnom stanju, u nastojanju da budemo značajna podrška našim članicama”, zaključio je predsjednik komore.

akta.ba



Predsjednica Uprave NLB Banke d.d. Sarajevo, za klix.ba...

Protekla godina nas je mnogo naučila

U intervjuu sa predsjednicom Uprave NLB Banke d.d. Sarajevo predstavljen je kratak osvrt na poslovanje banke u proteklom periodu, kao i planovi za nastavak razvoja NLB Grupacije



Kakva je bila 2020. godina za NLB Banku d.d. Sarajevo?

Protekla godina donijela nam je neočekivane životne i poslovne izazove, ali nas je mnogo i naučila – dokazali smo da smo prilagodljivi, da se možemo ujediniti u jednoj misiji, ideji, projektu, te smo, uprkos otežanim okolnostima, postigli dobre rezultate na koje možemo biti ponosni. Naše najveće postignuće je što smo od početka pandemije pokazali da smo odgovorni, ozbiljno smo shvatili da je naša obaveza da štitimo svoje i zdravlje svojih najbližih, kolega i klijenata. Posebno smo sretni zbog činjenice da niko od naših zaposlenika nije bio ozbiljnije bolestan.

U 2020. smo dosta pažnje posvetili i našim klijentima, te su uspješno provedene aktivnosti na unapređenju ponude stambenih kredita i zabilježili smo i rast kreditnog portfolija. U segmentu poslovanja sa pravnim licima uspješno smo amortizirali negativne efekte pandemije dodjelom posebnih mjera, čime smo im olakšali da održe kontinuitet poslovanja. Provedena istraživanja od strane renomirane kuće Valicon su pokazala da je percepcija NLB Banke na tržištu rasla i da se nalazimo među top tri banke prema prepoznatljivosti brenda.

Na koji način ste odgovorili izazovima koje je donijela pandemija koronavirusa, kako ste prilagodili poslovanje novim uslovima?

Na novonastalu situaciju izazvanu pandemijom koronavirusa odgovorili smo spremno i efikasno. Vrlo brzo smo uspjeli organizovati rad većine naših uposlenika od kuće, a sve s ciljem zaštite njihovog, kao i zdravlja klijenata, ali i osiguranja kontinuiteta poslovanja Banke. Sve naše poslovnice od početka pandemije su snabdjevene zaštitnom opremom i dezinfekcijskim sredstvima. Poslovanje smo prilagodili na način da se pružanje usluga klijentima odvija uz minimalan rizik za njihovo i naše zdravlje, a formirali smo i Krizni štab Banke, koji je u stalnom zasjedanju i koji stalno prati situaciju i predlaže mjere kako bi učinak Covid-19 na kontinuitet poslovanja bio što manji. Iako smo se prvi put sreli sa ovakvom vrstom krize, mjere koje smo svi zajedno poduzeli su se

pokazale kao ispravne i efikasne. Pokazao nam je to i izuzetno mali broj zaposlenika koji su do sada oboljeli od Covid-19 ili su bili u samoizolaciji. Također, niti jedna poslovnica Banke u 2020. godini nije bila zatvorena zbog Covid-a. Gotovo cijelu 2020. godinu sve klijente/ fizička lica smo oslobodili naknade za interne i eksterne naloge putem E-bank i M-bank sistema kako bi sve transakcije mogli realizirati iz kuće, bez potrebe za dolaskom u poslovnicu Banke.

Među prvima ste krenuli sa odobravanjem moratorija za kredite, pa nam recite koliko ste zahtjeva primili u protekloj godini?

U skladu sa Odlukom Agencije za bankarstvo FBiH, NLB Banka je sprovedla niz mjera namijenjenih za pomoć klijentima kako bi lakše prebrodili ovo teško razdoblje. Jedna od tih mjera bio je i moratorij na otplatu kredita. U tom smjeru NLB Banka je među prvima počela sa odobravanjem moratorija, identifikovali smo sve klijente kojima je bio zabranjen rad u toku vanrednog perioda, ali i onima koji su ostali bez primanja ili su im ona bila umanjena u proteklom periodu. Uspješno i efikasno smo reagovali na primjenu Odluke Agencije vezanu za privremene COVID-19 mjere, te smo u protekloj godini odobrili iste za skoro 1.500 klijenata ukupne izloženosti preko 70 miliona KM.

Pandemija je ubrzala digitalizaciju i u bankarskom sektoru. Kako se NLB Banka prilagodila i šta ste sve na tom polju uradili?

Za 2020. godinu smo rekli da će biti godina digitalizacije i ona je to zaista i bila. Pandemija je uz sve negativne posljedice, dodatno ubrzala te procese, a mi smo iskoristili priliku, te smo značajno obnovili IT infrastrukturu i unaprijedili sigurnost poslovanja. Također, implementirali smo alate za nesmetanu i sigurnu online komunikaciju. U vrlo kratkom vremenu razvili smo aplikativnu podršku za realizaciju odluke FBA za moratorij i druge posebne mjere za kredite, garancije, kartice i pozajmice. Želim istaći i da je broj korisnika usluga elektronskog bankarstva u segmentu fizičkih i pravnih lica rastao zahvaljujući zajedničkim naporima koji smo uložili od početka godine.



Svoju društvenu odgovornost pokazali ste više puta u 2020, a možda su najznačajnije za istaći donacije zdravstvenim ustanovama. Možete li nam reći nešto više o tome?

Nažalost, pandemija je dodatno opteretila naš i onako opterećeni zdravstveni sustav i njima je prioritarno trebala podrška. NLB Banka je izdvojila preko 60.000 KM za podršku zdravstvu. Donirali smo novčana sredstva Kliničkom centru Univerziteta u Sarajevu i Univerzitetskom Kliničkom centru Tuzla, te bolnicama u Mostaru i Zenici. Osim ovih donacija namijenjenih za nabavku neophodne opreme za liječenje građana BiH, NLB Banka je i Kantonalnoj bolnici u Goraždu donirala hemodijalizni aparat za uspostavu hemodijaliznog centra za pacijente ovog kantona. Ovo je bio samo jedan od načina da se zahvalimo našim doktorima i medicinskim radnicima, onima koji su svih ovih mjeseci radili bez prekida kako bi se brinuli za naše zdravlje.

Oni kojima je pomoć itekako bila potrebna su i privrednici, a NLB je projektom #Okvirpomoci pomogla određenom broju njih. Koji su bili zadaci i ciljevi tog projekta?

Osim zdravstvenih ustanova, u problemima su se našli i privrednici u BiH, te smo kao NLB Grupacija pokrenuli projekt #Okvirpomoci koji je bio namijenjen isključivo njima – malim poduzetnicima, poljoprivrednicima, te mikro i malim kompanijama. Cilj nam je bio da im pomognemo da budu vidljiviji, te smo im ustupili besplatan prostor za reklamu na dogovorenim lokacijama oglašavanja. Na naš poziv javio se veliki broj firmi, a mi smo odabrali njih deset. Riječ je o firmama iz različitih oblasti, od privatnih vrtića, turističkih agencija, proizvođača, trgovina i drugih. Pokazalo se da im je ta pomoć dobro došla i da su zahvaljujući ovom projektu uspjeli da se više približe kupcima i potrošačima u BiH, što im je u konačnici pomoglo i da prebrode tešku godinu koja je iza nas. Želim istaći i da je ovo, osim pomoći privrednicima, bila i podrška medijima putem kojih smo se oglašavali, a koji su također zabilježili značajan pad prihoda. S obzirom na to da su oni nama poklonili povjerenje i odabrali nas za svoju banku, naša obaveza je bila da im to povjerenje i uzvratimo. Očekujemo da će njihovo poslovanje u narednom periodu ići samo uzlaznom putanjom.



Krajem 2020. godine završeno je preuzimanje Komercijalne banke, pa nam recite koliko je to značajno za NLB Grupaciju?

Ulaskom u NLB porodicu, Komercijalna banka postaje još snažnija, i sa stanovišta perspektive širenja tržišta, i sa stanovišta finansijskog potencijala za podršku klijentima, koji imaju mnogo razloga i da od Banke, koja je postala dio međunarodne finansijske grupacije, očekuju još više. S druge strane, završetak ovog procesa označio je još jednu vrlo važnu prekretnicu u strategiji Grupe da postane vodeća finansijska institucija sa fokusom i sjedištem u našoj matičnoj regiji – Jugoistočnoj Europi.

Lidija Žigic, predsjednica Uprave NLB Banke d.d. Sarajevo

Šta možemo očekivati od NLB Banke u 2021. godini? Imate li u planu neke nove usluge ili projekte?

U 2021. godini želimo prije svega ostati Banka kojoj klijenti vjeruju. Niko od nas ne može sa sigurnošću znati kada i kako će se završiti pandemija. Nadamo se najboljem, a u međuvremenu vrijedno radimo na tome da našim klijentima ponudimo nove i moderne proizvode koji će olakšati poslovanje sa bankom. Već sada mogu najaviti novu uslugu mobilnog bankarstva za srednja i mala preduzeća gdje smo klijentima omogućili da pod jednom autorizacijom obavljaju transakcije i kao pravno i kao fizičko lice. Više neće biti potreban USB ili kartica za pristup aplikaciji. Izuzetno mi je drago da je NLB Banka Sarajevo na našem tržištu prva ponudila aplikaciju koja objedinjava sve ove funkcionalnosti i pruža maksimalno korisničko iskustvo našim klijentima. Početkom ove godine otvorili smo novu savremenu poslovnicu u Sarajevu u naselju Otoka, te ćemo i narednom periodu aktivno slušati naše klijente i biti tamo gdje je njima najbliže. Unaprijediti ćemo mrežu bankomata kroz povećanje broja bankomata koji omogućavaju uplate i beskontaktnu transakciju, raditi na uvođenju dodatnih sigurnosnih rješenja za kupovinu na internetu, implementaciju e-commerce usluga, proširenje usluga u dijelu Kontakt centra te još mnogo toga. U segmentu pravnih lica i dalje ćemo nastojati biti partneri kompanijama, a od konkretnih projekata bih izdvojila da u 2021. godini očekujemo implementaciju Garancijske Linije te Factoring-a, dva nova proizvoda za dokumentarno poslovanje. Zapošljavati ćemo nove ljude i raditi na unapređenju svih naših usluga kako bismo dodatno ubrzali procese digitalizacije. Naša namjera je bila da postanemo regionalni šampioni i mislim da smo to i uspjeli. Važan dio misije NLB Grupe je također i izgradnja boljeg života, bolje budućnosti za cijeli region u kojem Grupa posluje i zbog toga smo ponosni što je NLB Grupa postala potpisnik Principa odgovornog bankarstva Ujedinjenih nacija čime potvrđujemo i našu odgovornost u formiranju održive budućnosti. Ovaj važan korak pokazuje da zaista brinemo o regionu u kojem poslujemo i živimo, jer NLB Grupa nije samo finansijska institucija. Razumijemo industriju u kojoj radimo i društvo i region u kojem živimo i želimo doprinijeti boljim uslovima poslovanja i kvaliteti života ljudi. Cilj nam je imati održivu ulogu na tržištu i ostaviti pozitivan trag u zajednici i okolini. Zbog toga ćemo nastaviti podržavati kompanije koje posluju lokalno i regionalno, a koje također shvataju svoju ulogu u društvu kao što je shvatamo i mi. Srce i um NLB Grupe su ovdje i zbog toga nam je ambicija da svjedočimo cjelokupnom napretku regije.

klix.ba



Fabrika 5 godina posluje u stečaju...

Stolovi iz Konjuha stigli do Francuske

Za daljnji razvoj fabrike nema političkog sluha



Drveni stolovi proizvedeni u Fabrici namještaja Konjuh u Živinicama nedavno su izvezeni u Francusku. Ova fabrika već pet godina posluje u stečaju, ali je za veći uspjeh i nesmetan rad potreban angažman nadležnih, koji će riješiti njen status. U živiničkom Konjuhu u stečaju danas je angažovano blizu 30 radnika koji se uglavnom bave proizvodnjom kancelarijskog i školskog namještaja za kupce u Republici Srpskoj. Po narudžbi proizvode i druge predmete od drveta, a prije nekoliko dana prvi šleper drvenih stolova izvezen je u Francusku. S inozemnim kupcem sklopljen je posao u vrijednosti od skoro 80 hiljada konvertibilnih maraka, a za njega se trenutno pripremaju nove količine stolova koje će do kraja mjeseca biti otpremljene u još dva šlepera.

“Ovaj posao je za nas značajan, a stolovi koje smo proizveli su na razvlačenje i odličnog su kvaliteta, što je prepoznao i naš kupac. Osim ovih stolova, mi smo ranije izvozili i stolice koje imamo u svom asortimanu”, kaže za Klix.ba predsjednik Sindikata Konjuha Mujo Gavranović.

Kapaciteti ove fabrike su mnogo veći, a radnici navode da za unapređenje angažmana trenutno nema poslovnog, ali ni političkog sluha. Pojašnjavaju da im problem predstavlja neriješen status ove fabrike, koja se već pet godina nalazi u stečaju.

“Mi imamo proizvodnju, ali nismo zadovoljni, jer smo stečaj zamišljali drugačije. Vjerovali smo da će veoma brzo početi raditi 300 ljudi, ali nas je sada skoro 30. Zbog trenutnog statusa nismo konkurentni na tržištu, a otežana nam je i nabavka sirovine i repromaterijala. Njega mora kupiti kupac naših proizvoda, što je za mnoge komplikovano. Da imamo bilo kakve pomoći nadležnih, sigurno bismo bolje radili i imali veći broj zaposlenih”, dodaje Gavranović.

Ilustrujući način poslovanja, Gavranović navodi da su dogovor s kupcem iz Francuske postigli tako što je on unaprijed isplatio novac za namještaj, od kojeg su radnici nabavili repromaterijal.

“Naš namještaj je zastupljen i u javnim ustanovama u Republici Srpskoj, gdje su prepoznali naš rad. Tri ili četiri općinska kabineta smo opremili našim kancelarijskim namještajem, a školski namještaj se nalazi u svim tamošnjim školama. Nadamo se da će ovakvih prilika za sklapanje posla biti i u bližoj budućnosti”, ističe Gavranović.



Strateški partner Živinčanima bi bio od velikog značaja, međutim njega je teško osigurati zbog činjenice da ne postoji mogućnost prodaje imovine ovog nekadašnjeg giganta u cijelosti. Naime, takvu prodaju je nemoguće realizirati zbog sudskog spora s Gradom Živinice, a koji zahtijeva urbanistički plan.

Prodaja imovine realizira se dijeljenjem na lotove, međutim, prema Gavranovićevim riječima, ozbiljan strateški partner koji se ranije pojavljivao, na takvu kupovinu ne može pristati.

“Svakog mjeseca imamo oglašavanje prodaja, međutim niko nije zainteresiran za takav način kupovine imovine. Promjena vlasništva za nas je najbolje rješenje, jer ova fabrika ima svoj brend i znamo da bismo shodno našem kvalitetu uspjeli”, ističe Gavranović.

Stečajni postupak u Konjuhu je proglašen u septembru 2016. godine i od tada se više od hiljadu radnika nalazi u nezavidnom položaju. Blizu 60 nekadašnjih radnika danas ispunjava uslove za odlazak u penziju, ali neplaćeni radni staž im onemogućava ostvarivanje tog prava.

“Prijašnji dioničari su uništili Konjuh, a svemu tome je kumovala i država koja nije reagovala na vrijeme i dozvolila je propast. Nažalost, država ni sada ne reaguje na adekvatan način, iako bi od ove fabrike koristili mogli imati mnogi. Prošle godine Vlada Federacije BiH nas je odbila, onemogućivši nam novčana sredstva za uvezivanje radnog staža. Nažalost, uvijek smo na posljednjem mjestu i tako je i ovaj put”, žali se Gavranović.

Konjuh se našao u stečaju na osnovu zahtjeva Razvojne banke Federacije BiH, a kojoj je ova fabrika dugovala novac za kredit. U postupak se ušlo shodno čvrstim obećanjima Vlade Tuzlanskog kantona, koja je postigla inicijalni dogovor sa stranim investitorom, koji je trebao otkupiti fabriku i početi proizvodnju. Ali, do zvaničnog dogovora nikad nije došlo.



Miralem Mešković za klix...

“Pandemija pogodovala razvoju turizma u TK”

Turistički radnici u Tuzlanskom kantonu pandemiju su prepoznali kao šansu za razvoj domaćeg turizma

Pandemija i zatvorenost evropskih zemalja prema turistima iz Bosne i Hercegovine pogodovali su razvoju domaćeg turizma u Tuzlanskom kantonu. Tamošnje planine, izletišta i komplekse ove zimske sezone posjećuju gosti iz svih dijelova naše zemlje. Turistički radnici u Tuzlanskom kantonu pandemiju su prepoznali kao šansu za razvoj domaćeg turizma, zbog čega su u proteklim mjesecima radili na kreiranju ponuda kojima će privući domaće goste u zimskom periodu. Da su u tome uspjeli, pokazuje sve veći broj onih koji posjećuju planine, izletišta te kulturno-historijske i sportske komplekse kojima je bogata tuzlanska regija.



“U ovu zimsku turističku sezonu smo ušli pogođeni pandemijom, ali turistički djelatnici na području cijelog kantona, uz lokalne institucije, potrudili su se ublažiti negativne posljedice. To smo, između ostalog imali na području Tuzle, Lukavca i Banovića, gdje su osmišljavanjem novih turističkih proizvoda, odnosno sadržaja, nastojali privući posjetitelje, svakako uz pridržavanje epidemioloških mjera”, kaže za Klix.ba Miralem Mešković, voditelj turističkog ureda Turističke zajednice TK. Na području Tuzlanskog kantona trenutno postoji samo jedan ski lift i to na Karauli nadomak Kladnja. Formiran je olimpijske 1984. godine, a u kantonalnoj turističkoj zajednici navode da su u proteklom periodu posjetitelji pokazivali zainteresiranost za ovim kompleksom u kojem zbog nedostatka snježnog pokrivača nije bilo moguće skijanje, ali je svakako pružao priliku za uživanje na čistom zraku.

“Za razliku od ranijeg perioda kada nam je nedostajao snijeg, posljednjih nekoliko dana dobijamo nadu da ćemo imati i u tom smislu ostvaren značajan broj skijaških dana. Nadamo se da će nam pored gostiju iz grada i kantona dolaziti i gosti iz ostalih dijelova naše zemlje”, ističe Mešković.

Hotelski kapaciteti koji se nalaze u neposrednoj blizini izletišta i planinskih predjela u Tuzlanskom kantonu od početka zimske sezone do danas imali su goste iz svih dijelova naše zemlje koji su svoje godišnje odmore željeli provesti prije svega u prirodi i na svježem zraku.

“Možemo se pohvaliti da smo uspjeli animirati dosad neiskorištene kapacitete kao što su planinarski domovi, lovačke kuće i slično, tako da su naša Majevisa i Konjuh ispunjeni gostima koji uživaju u planinama Tuzlanskog kantona”, dodaje Mešković.

Razlog za znatno veću posjećenost planina tuzlanske regije, ali i okolnih izletišta te kulturno-historijskih i sportskih kompleksa, u Turističkoj zajednici TK vide u činjenici da su se evropske zimske destinacije ove sezone zatvorile za strane turiste zbog pandemije i higijensko-epidemioloških mjera koje su na snazi.

“Mi smo, neskromno rečeno, pandemiju prepoznali kao priliku za razvoj i unapređenje domaćeg turizma. Ove godine ne možemo reći da imamo jedno šarenilo organiziranih posjeta stranih turista, ali u svakom slučaju možemo biti zadovoljni jer nam dolaze domaći gosti”, nastavlja Mešković. Pored spomenutih lokaliteta, postoje i brojni drugi vrijedni turistički dragulji koji zaslužuju istu pažnju, a nalaze se u ruralnim područjima kojima posjetitelji već uveliko pohode. Iz Kantonalne turističke zajednice gostima preporučuju prije svega neprevaziđenu planinu Konjuh, ali i područje Muške vode na kojem se nalazi sportsko-rekreacioni centar čija je adaptacija u završnoj fazi.

Zimsku idilu nudi i kompleks Zlaća nadomak Banovića, sportsko-rekreacioni kompleks Orion kod Srebrenika kojeg krasi i stari grad, odnosno utvrda, ali i planina Majevisa sa planinarskim domovima koji su svoju ponudu posebno obogatili u aktualnoj zimskoj turističkoj sezoni.

Bilo koji od danas turističkih lokaliteta da posjetite u Tuzlanskom kantonu naići ćete i na odličnu gastronomsku ponudu u brojnim ugostiteljskim objektima, a prednost je i u cijenama smještaja, hrane i pića.

Gosti koji se odluče nekoliko dana provesti u Tuzlanskom kantonu spavanje će u prosjeku platiti između 20 i 100 konvertibilnih maraka, u zavisnosti da li je riječ o sobama u privatnim objektima, sportsko-rekreacionim kompleksima ili hotelima.



Sastanak predstavnika Vlade TK i USAID-a...

20 miliona dolara za razvoj turizma u BiH

Prezentiran petogodišnji projekt razvoja održivog turizma u BiH



Predstavnici Američke agencije za međunarodni razvoj (USAID) su delegaciji Vlade Tuzlanskog kantona i premijeru Kadriji Hadžiću prezentirali petogodišnji projekt razvoja održivog turizma u BiH u okviru kojeg će ova američka organizacija na područje Bosne i Hercegovine plasirati 20 miliona dolara. Cilj ovog petogodišnjeg projekta je potpora ekonomskom razvoju pokrenutom turizmom te promocija društvene harmonije kroz prirodno aktiviranje bogatog kulturnog naslijeđa i prirodnih ljepota BiH.

„Velika nam je čast i zadovoljstvo biti domaćin predstavnicima USAID-a koji su nam prezentovali taktički plan za oporavak turizma u BiH. Danas će, ono što je najznačajnije, sa našim turističkim radnicima imati jednu prezentaciju na kojoj ćemo prezentirati probleme sa kojima se susrećemo i naravno ciljeve koje smo pred sebe postavili. Tuzlanski kanton je bogat kulturno-historijskim spomenicima, bogati smo prirodnim ljepotama, ali nam nažalost nedostaju određeni dokumenti, prije svega strateški, kako bi mogli turizam staviti u funkciju razvoja ukupnog društva, a to je upravo ono što bismo dobili realizacijom ovog programa“, kazao je ministar trgovine, turizma i saobraćaja Hamza Bešić.

Projektna menadžerica USAID-a Dobrila Vukmanović kazala je da je projekt ove agencije „Turizam“ počeo na jesen prošle godine.

„Projekt će biti implementiran tokom sljedećih pet godina i to je jedan od najvećih USAID-ovih projekata u ovoj regiji u posljednjem desetljeću. Prepoznali smo važnost sektora turizma u BiH i počeli smo raditi na tom polju u 2018. i 2019. godini, prije covid-19“, kazala je Vukmanović.

Tada je turizam bio u velikom rastu s preko dva miliona noćenja i preko 400 miliona eura prihoda, ali sam položaj BiH na listi Svjetske trgovačke organizacije, na kojoj je naša zemlja zauzimala 105. mjesto među 142 zemlje, ukazivao je da se još puno toga treba uraditi.

„Koronavirus nas je dočekaio nespremljeni i broj noćenja je pao preko 80%, te je dosta ljudi ostalo bez posla. USAID je brzo reagirao novim projektom, gdje smo uradili covid preporuke i sada zajedno radimo s vladama na svim nivoima u BiH na planu oporavka kako bi bili spremni za povratak turista u ovaj kraj“, dodala je Vukmanović.

„Turistička zajednica Tuzlanskog kantona, kao

nezaobilazan faktor u kreiranju ukupne ponude turizma našeg kantona, prepoznala je, nametnula se ovom projektu, ovim divnim ljudima koji nam nude pomoć i podršku i naravno iskustvo da u sadejstvu u ovom periodu od pet narednih godina na najadekvatniji način promoviramo i prezentiramo Tuzlu i Tuzlanski kanton. Zaista imamo mnogo toga da ponudimo i prezentiramo gostima. Spadamo u vid kontinentalnog turizma. Dakle, šansa je sad u ovoj eri pandemije, gdje su naše destinacije prije svega planine, nedirnute Konjuh, Majevica i druge, da to bude strateško opredjeljenje. Također, tu je i zdravstveni turizam. Renomirane zdravstvene banjsko – klimatske ali i druge zdravstvene ustanove su već prepoznate u regionu i to je prilika da ovdje radimo i na intenzivnijem razvoju ove grane turizma“, kazao je voditelj Turističke zajednice TK Miralem Mešković.



Nakon sastanka u Vladi Tuzlanskog kantona, predstavnici USAID-a su održali sastanak u Turističkoj zajednici Tuzlanskog kantona, te posjetili Panonska jezera u Tuzli, kompleks Muške vode i skijalište u Kladnju.

D.K.



Iz Međunarodnog aerodroma Tuzla...

Od 30. marta letovi na svih osam destinacija

Zbog pandemije smanjeni prihodi u 2020. godini



Zbog pandemije koronavirusa, u 2020. godini smanjeni su prihodi Međunarodnog aerodroma Tuzla (MAT), umanjeno je broj putnika, a broj letova je manji za 50 posto u odnosu na godinu ranije. Kada se uporedi sa 2019. godinom, ostvareni obim prijevoza iznosi 39 posto, odnosno broj putnika je smanjen za 61 posto, potvrdio je Feni direktor Međunarodnog aerodroma Tuzla Esed Mujačić. Prema njegovim riječima, tokom 2020. godine s tuzlanskog aerodroma prevezeno je oko 228.000 putnika, dok je tokom godine ranije broj prevezenih putnika iznosio 592.000. Također prihodi MAT-a su smanjeni 50 posto u odnosu na raniji period.

– Imali smo dodatnih prihoda osim prijevoza putnika, ali to nije dovoljno da bi se pokrili svi troškovi poslovanja. Dobili smo pomoć od kantonalne i Federalne vlade, to nam je pomoglo da nadoknadimo gubitke koje su nastali kada je Aerodrom zbog nesretnih okolnosti i naredbi resornog ministarstva bio zatvoren – kazao je Mujačić, navodeći da ovaj aerodrom još uvijek radi smanjenim kapacitetom i trpi gubitke, izvijestila je Fena. S tuzlanskog aerodroma privremeno su obustavljeni letovi prema osam destinacija: Bilund (Danska), Cologne, Friedrichshafen, Berlin, Baden Baden (Njemačka) Salzburg i Beč (Austrija) i Vaxjo (Švedska), što predstavlja 50 posto od ranijeg broja letova. Sa tuzlanskog aerodroma trenutno su aktivni letovi u četiri evropske zemlje na osam destinacija: Memmingen, Frankfurt Hahn, Dortmund (Njemačka), Malmo, Geteborg i Štokholm (Švedska), Besel (Francuska) i Eindhoven (Holandija). **– Uspjeli smo zadržati radnike i održati likvidnost preduzeća, smanjili smo troškove za oko 40 posto. Kada se uporedi tuzlanski aerodrom s ostalim aerodromima u regiji, koji su pretrpjeli posljedice izazvane COVID-19 mi smo bolje poslovali od ostalih. U 2019. godini kada je sve radilo imali smo gubitak od 307 hiljada KM, što znači da je u ovom uvjetima ovo odlična finansijska bilansa. U regionu smo u 2020. godini prvi po broju putnika od svih malih aerodroma, Sarajevo je, naprimjer, ispred nas za samo 20 hiljada putnika –** naglasio je Mujačić.



Dodao je da je najlošiji period poslovanja bio u novembru 2020. godine, kada je zabilježen najmanji broj putnika, a mjesec kasnije je blago povećan zbog novogodišnjih praznika. Najavio je da će u februaru ove godine biti povećan broj letova sa devet na 20 sedmično. **– Od 30. marta ove godine ponovo planiramo vratiti letove za svih osam destinacija koji su privremeno obustavljeni, dakle imat ćemo letove na ukupno 16 destinacija, očekuje se puni obim prijevoza, te vraćanje svih destinacija na koje se saobraćalo prije pandemije –** tvrdi Mujačić. Očekuje da će aviokompanija Wizz Air od aprila ove godine uspostaviti puni saobraćaj s MAT-a i da će sve normalno funkcionisati kao i 2019. godine. Uprkos prošloj godini koja je bila veoma loša za poslovanje MAT kreće u realizaciju jedne veće investicije.

„Projekat gradnje Atrija počinje, najvjerovatnije, naredne sedmice, a koštati će oko 1,1 milion maraka“, navodi direktor MAT-a.

Atriju MAT-a trebale bi biti smještene putničke agencije, rent-a-car kuće i suvenirnice.

D.K.



AS Holding u prošloj godini povećao izvoz 11 %

Tuzlanska so među brendovima sa najboljim rezultatima

Tržišta Zapadne Europe i Sjeverne Amerike imala su konstantan rast



Kompanije AS Holdinga u prošloj 2020. povećale su izvoz za 11 posto u odnosu na 2019. godinu. Najbolje rezultate postigli su Zlatna džezva, Tuzlanska so, KENT konditorski proizvodi, brašno Zlatni puder i Klas jufke, zatim TOS i OAZA. Najveći rast brendovi AS Holdinga postigli su na tržištima Njemačke, Sjedinjenih Američkih Država, Austrije, Skandinavije i Velike Britanije.

- Prepoznatljivi po kvalitetu

– Tržišta Zapadne Europe i Sjeverne Amerike imala su konstantan rast. U posljednje dvije godine dobijamo sve više upita za našim proizvodima sa postojećih i potencijalnih tržišta. Postajemo prepoznatljivi po kvalitetu,

ali i po odgovornom radu sa distributerima. Vodimo računa o svakom detalju i svim proizvodima od nabavke sirovina pa do konzumacije krajnjeg potrošača, što je prepoznato u više od trideset država na pet kontinenata gdje izvozimo naše proizvode. Sve naše članice prehrambene divizije Vispak, Solana Tuzla, Klas, AS Jelah, AC Food, Oaza, bilježe porast izvoza. Posebno raduje što naš program Bosanske kuhinje i naših brendova koji baštine našu tradiciju sve više nalaze fanove i potrošače na inozemnim tržištima koji nisu nužno porijeklom sa ovih prostora. Primjerice, Vispakova Zlatna džezva je druga po prodaji u kategoriji tradicionalnih kafa u Sloveniji. Smatramo da u tom pravcu postoji ogroman potencijal, te da naše kompetencije i pozicije na tržištu u tom smislu jačaju iz godine u godinu – istakao je Rusmir Hrvic predsjednik Uprave AS Holdinga.

Hrvic: Vodimo računa o svakom detalju i svim proizvodima (Foto: AS holding)

U 2021. godini u AS Holdingu se nadaju postepenoj normalizaciji tržišta i to već od drugog kvartala, nakon svih negativnih posljedica izazvanih pandemijom COVID-19 virusa.

- Otvaranje novih tržišta

Fokus ostaje jačanje pozicija na postojećim tržištima, ali i otvaranje novih tržišta u Istočnoj Europi i Sjevernoj Africi.

Izlazak Velike Britanije iz EU i izostanak pravovremene reakcije organa države BiH doveo je do toga da nemamo potpisan Ugovor o slobodnoj trgovini gdje su nas 1. januara dočekale takse.

– Novonastala situacija djelomično nam remeti planove i ugrožava pozicije građene proteklih dvadeset godina – navode u kompaniji AS Holding.

wbb.media

Iz RMU Banovići...

Kudumović ostaje na čelu RMU Banovići

Razrješenje vršilaca dužnosti članova Uprave – direktora i izvršnih direktora



Nadzornom odboru RMU Banovići d.d. Banovići Vlada Federacije BiH je dala prethodne saglasnosti za razrješenje vršilaca dužnosti članova Uprave – direktora i izvršnih direktora ovog privrednog društva, zbog isteka perioda na koji su imenovani, kao i za imenovanje za vršiocima dužnosti Fadila Kudumovića (direktor), Elvira Jamakovića (izvršni direktor za tehničke poslove), Damira Mrkonjića (izvršni direktor za investicije i razvoj novih djelatnosti), Jasmine Husić – Mujić (izvršna direktorica za pravne i kadrovske poslove) i Ibrahima Demirovića (izvršni direktor za ekonomske poslove), na period najduže do šest mjeseci.

Za učešće u radu i odlučivanju na skupštinama privrednih društava opunomoćeni su Kenan Osmanagić (Hrvatska pošta d.o.o. Mostar), Jadranko Puljić (Ceste d.d. Mostar), te Jasmina Pašić (Elektroprivreda BiH d.d. Sarajevo) i (RMU Banovići d.d. Banovići).

D.K.



Ekonomija...

Izvoz iz BiH u januaru porastao za 2,9%



Izvoz Bosne i Hercegovine u januaru ove godine iznosio je 881 milion KM i bilježi povećanje za 2,9 posto u odnosu na januar lani, dok je uvoz iznosio jednu milijardu i 166 miliona KM što je manje za 5,7 posto. Pokrivenost uvoza izvozom je iznosila 75,6 posto, a vanjskotrgovinski robni deficit 284 miliona KM, objavila je Agencija za statistiku BiH. Izvoz u zemlje CEFTA iznosio je 126 miliona KM i povećan je za 1,5 posto u odnosu na januar prošle godine, dok je uvoz iznosio 131 milion KM što je manje za 9,4 posto. Pokrivenost uvoza izvozom sa zemljama CEFTA-e iznosila je 95,8 posto. Izvoz u zemlje EU je iznosio 665 miliona KM i porastao je za 6,4 posto u poređenju sa januarom lani, dok je uvoz iznosio 711 miliona KM, što je manje za 5,6 posto. Pokrivenost uvoza izvozom sa zemljama EU iznosila je 93,5 posto.

indikator.ba

Potrošačke cijene u BiH u januaru porasle 0,4%



Cijene proizvoda i usluga koje se koriste za ličnu potrošnju u Bosni i Hercegovini mjerene indeksom potrošačkih cijena, u januaru ove godine u odnosu na prethodni mjesec u prosjeku su zabilježile rast za 0,4 posto. Prema podacima Agencije za statistiku BiH, alkoholna pića i duhan u prosjeku su skuplji za dva posto, hrana i bezalkoholna pića, te prijevoz za po 1,1 posto, namještaj i aparati za domaćinstvo za 0,7 posto, zdravstvo, te restorani i hoteli za po 0,1 posto, i ostala dobra i usluge za 0,3 posto. U januaru ove godine u odnosu na prethodni mjesec, odjeća i obuća u prosjeku su jeftiniji za 6,1 posto, a stanovanje i režijski troškovi za 0,1 posto. Nivo cijena u januaru ove u odnosu na januar prošle godine niži je za 1,7 posto. Alkoholna pića i duhan u prosjeku su skuplji za 1,9 posto, hrana i bezalkoholna pića za 0,1 posto, zdravstvo za 0,9 posto, komunikacije za 0,1 posto, obrazovanje za 0,3 posto, a restorani i hoteli,

te ostala dobra i usluge u prosjeku skuplji za po 0,6 posto. U januaru ove u odnosu na januar prošle godine, odjeća i obuća jeftiniji su u prosjeku za 10,9 posto, prijevoz za 9,4 posto, namještaj, kućanski uređaji i redovno održavanje kuće za 1,4 posto, te stanovanje i režijski troškovi za jedan posto.

FENA

Pala prosječna cijena stana u BiH u posljednjem kvartalu 2020.



Prosječna cijena prodanih novih stanova u četvrtom kvartalu prošle godine u BiH iznosila je 1.724 KM po metru kvadratnom i manja je za 1,6% u odnosu na isti kvartal 2019. godine. Prosječna cijena prodanih novih stanova u četvrtom kvartalu lani veća je za 2,7% u odnosu na prosječnu cijenu prodanih novih stanova u 2019. godini, podaci su Agencije za statistiku BiH. U četvrtom kvartalu prošle godine prodato je 939 novih stanova, što je u odnosu na isti kvartal 2019. godine manje za 35,3%, a u odnosu na prosjek u 2019. godini više za 12,3%. Površina prodanih novih stanova u posljednjem tromjesečju lani manja je za 35,5% u odnosu na isti period 2019. godine, a veća je za 9,4% u odnosu na prosjek u 2019. godini. U BiH prošle godine završeno je 2.429 stanova, što je za 16,5% manje u odnosu na 2019. godinu. Na kraju četvrtog kvartala prošle godine bilo je 4.117 nezavršenih stanova, što predstavlja rast od 3,5% u odnosu na isti period 2019. godine.

indikator.ba



Redovni remont postrojenja Fabrike cementa Lukavac

Poboljšanja svih ekoloških aspekata proizvodnje

Redovni godišnji remont u periodu od 11.1. do 1.3.



U Fabrici cementa Lukavac je u periodu od 11.1. do 1.3. obavljen redovni godišnji remont postrojenja. Tehnički direktor Nedim Pašić je povodom tih aktivnosti naglasio da će nakon obavljenog remonta biti dodatno unaprijeđena energetska učinkovitost u proizvodnji klinkera, te da će radovi u okviru remonta donijeti i nova poboljšanja svih ekoloških aspekata proizvodnje, s posebnim osvrtnom na maksimalno povećanje udjela alternativnih goriva i smanjenje korištenja fosilnih goriva.

„Dosadašnja ulaganja u modernizaciju i razvoj naše cementare u skladu sa evropskim normama smatramo velikim postignućem, jer smo na ovaj način uspjeli da minimiziramo štetne uticaje na kvalitet vazduha i okoliša. Najbolji primjer je činjenica da zvanični podaci mjerenja parametara kvaliteta zraka u Lukavacu i okolini tokom ljeta kada fabrika radi u punom kapacitetu pokazuju dobru kvalitetu, dok u zimskim mjesecima kada ne radimo zagađenje vazduha je znatno povišeno. Naše čvrsto opredjeljenje je strogo pridržavanje svih propisanih mjera za zaštitu životne okoline i bezbjednost i zdravlje uposlenika i građana. U fokusu su nam projekti daljeg unapređenja poslovanja i održivog razvoja, kao i inicijative i programi podrške lokalnoj zajednici i mladim generacijama“ – istakao je Pašić.

Fabrika cementa Lukavac je uprkos svim nedaćama koje je donijela 2020. godina uspješno i bez prekida okončala proizvodnju cementa prema planiranim količinama, sačuvana su sva radna mjesta i ostvareni dobri prodajni rezultati.

Od aprila novosti u NLB...

NLB od aprila uvodi ležarinu za depozite veće od 250 hiljada eura

NLB ih ne namjerava uvoditi ležarinu za iznose niže od 100.000 EUR



U aprilu će NLB uvesti ležarinu za velika stanja na ličnim računima, štednim računima, postepenoj štednji i depozitima. Oni će se izračunati za prosječna mjesečna stanja preko 250.000 eura i iznositi će 0,04 posto mjesečno. Banka će izračunati ležarinu u maju, objavila je Banka. To znači da će klijent, ako tokom aprila ima 50.000 eura iznad limita od 250.000 eura, mjesečno platiti 20 eura, objasnili su. Naknada se odnosi na vrlo mali broj klijenata, nekih 100 iz mreže i još nekoliko iz privatnog bankarstva, prema magazinu Financ-e oko 300. Prvi čovjek najveće banke u državi Blaž Brodnjak nedavno je najavio uvođenje naknada za čuvanje novca i za fizičke osobe. - **U prvoj polovini 2021. godine postoji velika vjerovatnoća da će se nameti uvesti u Sloveniji, vjerovatno postepeno i u posljednjem koraku za gotovinske depozite preko 100.000 eura, odnosno isto kao za depozite preduzeća,** rekao je nedavno u intervjuu za Delo. NLB ih ne namjerava uvoditi ležarinu za iznose niže od 100.000 EUR. U okruženju negativnih kamatnih stopa, koje traju od sredine 2014.

godine, neke banke u inostranstvu i u Sloveniji prenijele su negativnu kamatnu stopu Evropske centralne banke na kompanije, druge finansijske organizacije i državu. Neke banke u Njemačkoj, Italiji, Luksemburgu, Holandiji, Danskoj i Švicarskoj također su uvele negativne kamatne stope ili namete za fizička lica, ali uglavnom na velike depozite, odnosno preko 100.000 eura, podsjeća RTV Slovenije. Prema podacima centralne banke iz februara prošle godine, domaćinstava koja su u banci imala više od 100.000 eura bilo je jedan odsto, ali su imala 36 posto svih depozita po viđenju.

D.K.



Najava sajamskih aktivnosti i manifestacija...

Split: Sajam "GAST 2021", od 14. do 17.4.



Uoči još jedne turističke sezone i prilike da hrvatska turistička ponuda zasja u punom sjaju, pozivamo vas na 25. međunarodni sajam GAST 2021 – centralno mjesto okupljanja ciljne publike, poput vlasnika restorana, hotela i obiteljskih hotela, malih iznajmljivača te ugostiteljskih objekata iz čitave Dalmacije. GAST 2021 održava se od 14. do 17. 4. 2021. u splitskoj Spaladium areni. Ukoliko želite iskušati snage sa konkurencijom, plasirati nove proizvode, pokazati ono najbolje što imate, osvojiti novi tržišni prostor, pronaći nove partnere i učvrstiti odnose sa postojećima, sajam GAST 2021 kvalitetom svojih izložaka i bogatim stručnim programom konferencija i radionica omogućava da budete dio najznačajnijeg, vodećeg gastronomskog i turističkog događaja u Hrvatskoj, da ostvarite svoj poslovni potencijal te sudjelujete u stručno vođenoj medijskoj kampanji.

Radno vrijeme sajma je od 9.30 do 19.00 sati (srijeda-petak). U subotu od 9:30 do 18:00, a blagajna od 9:30 do 16:00 sati.

Sajam GAST 2021 obuhvaća niz specijaliziranih sajмова:

- 26. Međunarodni sajam prehrane
- 26. Međunarodni sajam pića
- 26. Međunarodni sajam hotelske i ugostiteljske opreme
- 26. Međunarodni sajam vina – Dionizijana
- 18. Međunarodni sajam namještaja – Furnitura
- 16. Međunarodni sajam kave
- 16. Sajam za turizam – Saturn
- 6. Međunarodni sajam sladoleda i slastica

Sajam GAST 2021, kao i prethodnih godina, prati niz zanimljivih događanja:

- Dionizijana – 26. međunarodno ocjenjivanje vina i jakih alkoholnih pića i svečana dodjela nagrada vinarima – Vodeće u Hrvatskoj!
- 10. Turistička mreža
- Splitska gastro scena – gastro noviteti za turističku sezonu
- Svakodnevni Show Cooking
- Slastičarske radionice
- Kreiranje vinskih lista
- Vođene vinske radionice
- Barmen Show
- Kuharski humanitarni show: "Poznati u kuhinji"

Sajam GAST – Pravo mjesto pripreme za vašu najuspješniju turističku sezonu!

Osijek: "17. Salori" sajam turizma, 16-18.4.

17. Sajam lova, ribolova i turizma – Salori & 24. Motomobil – Sajam automobila i prateće industrije - Datum održavanja: 16.4.2021. - 18.4.2021.



Osječki sajam d.o.o. pod pokroviteljstvom Osječko-baranjske županije, Grada Osijeka, Hrvatskog lovačkog saveza, Lovačkog saveza Osječko-baranjske županije i Hrvatskog športsko ribolovnog saveza, organizira sedamnaestu po redu sajamsku priredbu – SALORI 2021., manifestaciju koja svojom veličinom, brojem izlagača i značajem u razvoju lovnog, ribolovnog i kontinentalnog turizma predstavlja najznačajniju priredbu te vrste u našoj zemlji. Bit će to velika revija i predstavljanje brojnih lovačkih i ribolovnih društava i saveza, uz nezaobilaznu izložbu trofeja, kao i bogatu ponudu opreme i pribora za lov i ribolov. Prikaz mogućnosti seoskog turizma i raznovrsnost ponude gastronomskih specijaliteta naše regije dodatno će obogatiti obilje stručnih, zabavnih i sportskih sadržaja.

Istovremeno, na istoj lokaciji održat će se i 24. Sajam automobila i prateće industrije- MOTOMOBIL 2021. Sajam automobila je značajna sajamska priredba koja posjetiteljima pruža mogućnost

izravnog susreta na jednom mjestu, s brojnim automobilima, motorima, skuterima, te ponudom i novitetima prateće industrije. Naše iskustvo, stručnost i briga za interese i potrebe svakog našeg izlagača, najbolji su jamac uspješne organizacije i ovogodišnjih sajamskih priredbi.

Beograd: Sajam građevinarstva "SEEBBE", 21 – 24.4.2021.





Najveći sajamski događaj u građevinskoj industriji u jugoistočnoj Evropi, Sajam građevinarstva u Beogradu, održaće se od 21. do 24. aprila 2021. godine na Beogradskom sajmu. Specijalizovana je to međunarodna manifestacija koja obuhvata najrazličitije segmente građevinske industrije – od istraživanja i projektovanja, preko izgradnje i održavanja objekata u visokogradnji, niskogradnji i hidrogradnji, do predstavljanja najsavremenijih materijala, građevinskih mašina, uređaja i alata. Upotpunjuju ga i različiti načini adaptacije, rekonstrukcije i restauracije, kao i promocija starih zanata koji su druga krajnost savremenim informacionim tehnologijama i modernom upravljanju projektima. Kao finalna djelatnost, dio Sajma građevinarstva je i opremanje enterijera. Učesnici manifestacije su svi eminentni domaći i strani građevinski proizvođači, distributeri i trgovci opremom i materijalima. Oni za posjetioce Sajma svake godine pripreme posebne popuste i specijalne uslove plaćanja proizvoda i usluga. Sajam građevinarstva jedan je od najznačajnijih poslovnih sajmova u Srbiji i regionu, i događaj koji je za sve učesnike i posjetioce idealna prilika i ambijent za premijerna predstavljanja inovacija i tehničkotehnoloških rješenja.

Konferencija “Sajmovi kao učinkoviti poslovni alati”, Osijek: 2.6.2021.



“Moramo Vas, nažalost, obavijestiti da se konferencija o sajmovima u Osijeku „Sajmovi - učinkovit poslovni alat“ neće održati u predviđenom terminu. U dogovoru sa svim organizatorima odlučili smo termin pomaknuti na 2. lipnja 2021., službeni Međunarodni dan sajmovanja.

Razlozi pomicanja termina održavanja su višeslojni: realna trajna opasnost od pojačanoga naleta korona virusa, naglašena nesigurnost poslovnih aktivnosti mnogih subjekata, nemogućnost druženja sudionika kako je i uobičajeno na sajmovima, a naša odgovornost nam ne dopušta da konferenciju napravimo „polovično“ i uz zdravstvene rizike.

Očigledno, cijelo poslovno okruženje u ovom trenutku ne pogoduje konferenciji takvoga tipa, pa smo odlučili da se ona odgodi.

Hvala Vama koji ste bili spremni i u ovim okolnostima sudjelovati. Nadamo se da ćete tu spremnost iskazati i u drugoj prigodi.

Zahvaljujemo Vam na razumijevanju i potpori ovoj odluci, kojom smo se svi usuglasili da je prioritet očuvanje zdravlja svih sudionika.

Pozivamo Vas i očekujemo na konferenciji 2021. godine, navedeno je u saopćenju iz Organizacionog odbora.

Inače, Svjetski dan sajmovanja i izložbi (GED) biće obilježen u Osijeku 2. 6.2021. godine, u organizaciji časopisa i portala Suvremena trgovina i Osječkog sajma. Global Exhibition Day sveopća je proslava industrije izložbi i događanja i svih uključenih u nju, a doprinosi ciljevima održivog razvoja, koje su prihvatili Ujedinjeni narodi.

Posljednjih godina naročito dolaze do izražaja regionalni sajmovi, koji odražavaju snagu ukupnoga gospodarstva pojedinih područja. U tom pogledu regionalni sajmovi imaju trajnu vrijednost, jer potiču raznolikost i time obogaćuju ne samo svoju užu sredinu već otvaraju i šire mogućnosti plasmana i utjecaja.

Na poslovnom susretu u Osijeku planirano je da se razmotri ekonomska, socijalna i demografska funkcija sajmova i njihova uloga u privrednom životu određenoga područja. Poseban naglasak pri tome imat će teme:

- Što predstavljaju sajmovi danas?
- Novi oblici poslovne komunikacije
- Sajamski trendovi i nova rješenja
- Zašto su sajmovi (još uvijek) potrebni gospodarstvu?

Uz to, planirana je organizacija i zanimljive panel diskusije gdje će se govoriti o novom načinu ponašanja sajamskih posjetitelja te ulogi sajmova u marketingu miksu.

Pokrovitelj ove gospodarske manifestacije je, uz Županijske i Gradske strukture, Hrvatska gospodarska komora.

Podaci o globalnom ekonomskom utjecaju sajmova i izložbi vrlo dojmljivo potvrđuju značenje sajamske industrije. Sajmovi i stručne izložbe, naime, na globalnoj razini generiraju 275 milijardi eura ukupnog prihoda, a doprinose globalnom bruto društvenom proizvodu (BDP) 167 milijardi eura odnosno 198 milijardi USD. Oni podržavaju 3,2 milijuna radnih mjesta širom svijeta.


Veselimo se zajedničkom druženju!
Pozivamo Vas i očekujemo na konferenciji 2021. godine.
PRIJAVI SE ODMAH! Ulaz je slobodan.

D.K.



PRIVREDNA KRETANJA U TUZLANSKOM KANTONU ZA 2020.GODINU

U 2020. godini, u Tuzlanskom kantonu, došlo je do pada ukupnog obima industrijske proizvodnje u odnosu na prethodnu godinu za 2,6%. Prema područjima, prerađivačka industrija ostvaruje pad od 7%, vađenje ruda i kamena pad od 2,7%, a proizvodnja i snabdijevanje električnom energijom je ostvarila rast obima industrijske proizvodnje za 8,8%.



Industrijska proizvodnja 2020/2019 (%)

U 2020. godini iz Tuzlanskog kantona ukupno je izvezeno proizvoda u vrijednosti od 1.791.994.000 KM što je u odnosu na izvoz iz 2019. godine pad od 6,7%. U isto vrijeme je došlo do pada uvoza od 12,7% te je uvezeno roba u vrijednosti od 1.871.497.000 KM. Pokrivenost uvoza izvozom je 89%, a vanjskotrgovinski deficit je 200.182.000 KM.

U odnosu na 2019. godinu, došlo je do rasta izvoza hrane i pića za 10% i kapitalnih proizvoda 11,1%, dok je do pada izvoza došlo kod industrijskih materijala za 1,2% i kapitalnih proizvoda za 19,6%, dok je do pada izvoza industrijskih materijala 1,2%, goriva i maziva 35,3%, transportnih sredstava 14,3% i proizvoda za široku potrošnju 8,3%.

Pad uvoza ostvaren je kod hrane i pića 1,3%, industrijskih materijala 5,6%, goriva i maziva 36,4%, kapitalnih proizvoda 10,3%, transportnih sredstava 20,5% i proizvoda za široku potrošnju 14,5%. Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.


Na dan 31.12.2020. godine, prema podacima Porezne uprave Federacije BiH, u Tuzlanskom kantonu je 101.319 zaposlenih osoba. Najviše ih je u Tuzli (31.232), a slijede Živnice (12.731) i Gračanica (10.725). Na isti dan, u Tuzlanskom kantonu je evidentirano 76.878 nezaposlenih osoba.

Prosječna neto plata u Tuzlanskom kantonu u decembru je iznosila 895,00 KM što je ispod prosjeka Federacije BiH. U odnosu na kantonalni prosjek iz 2019. godine, neto plaća je veća za 8,6%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom (1.687 KM), dok su najniže prosječne neto plate u ugostiteljstvu i hotelijerstvu (557 KM).

Djelatnost		Tuzlanski kanton	
		Neto plaća	Bruto plaća
A	Poljoprivreda, šumarstvo i ribolov	837	1.269
B	Vađenje ruda i kamena	1.069	1.642
C	Prerađivačka industrija	706	1.066
D	Proizvodnja i snabdijevanje el.en., plinom	1.687	2.637
E	Snabdijevanje vodom i uklanjanje otpadnih voda	1.005	1.539
F	Građevinarstvo	595	896
G	Trgovina na veliko i malo	649	985
H	Prevoz, skladištenje i komunikacije	730	1.106
I	Hotelijerstvo i ugostiteljstvo	557	842
J	Informacije i komunikacije	1.325	2.071
K	Finansijske djelatnosti	1.405	2.213
L	Poslovanje nekretninama	829	1.268
M	Stručne, naučne i tehničke djelatnosti	910	1.407
N	Administrativne i pomoćne uslužne djelatnosti	627	932
O	Javna uprava i odbrana	1.298	2.012
P	Obrazovanje	835	1.288
Q	Zdravstvena socijalna zaštita	1.484	2.328
R	Umjetnost, zabava i rekreacija	856	1.318
S	Ostale uslužne djelatnosti	996	1.523



THE CHAMBER OF ECONOMY OF TUZLA CANTON



TUZLA CANTON

Your Business Partner

